

# MFUMU YE BAKANA



...mambo a lukumo lwa Nkambo pa kuletwa pe atweba leelo kupichila mu kusapwila Kyambo. Kabiji ke...

<sup>2</sup> Awe mulungu wapita, Najinga kulubaji lwa lubesha. Kechi kyakuuba mba kulubaji lwa lubesha ne; kyajinga ke kupimwa Nkonapichilemo, kupimwa kwa mubiji. Kabiji akye kyonwaumvwine, mba Najinga mu kipatala. Kyajinga mambo akuuba mba Naileko pakuuba mba kechi Nakonsha kuya ne kubwela na kukilang'anya mukola ne. Kupimwa ku lubaji lwa kwiulu, kabiji apa ne lubaji lwa kunshi. Kabiji bafwainwa, inge pa pitatu mamineti acheche, bafwainwa kubwela jibiji ba kupima na x-ray ne jikwabo. Bino twafwainwa kutambula, inge tuya mu mwingilo wa bushiya bwa tulunga, pakupitapo bang'ondo sikisi. Mulongo Roberts ne bakwabotu, Nalanguluka mba, abo batambula yabo pakupitapo bang'ondo sikisi. Bino Amiwa kechi nakitambulapo ne pa myaka foolo.

<sup>3</sup> Lwine lukatazho, Amiwa kechi natemwa manyi a kasita ne, akyo kyo kine kitu. Kabiji bamba mba kafwako kikwabo kyo bakonsha kupana ne, nanchi Ami, oo, Amiwa kanatu nakolwa bingi pakuuba mba bape byobya bitu. Anweba mwayukatu, Nemubula kala, mujishimikila ja bumi bwami, abye bintu bimbeleka bingi amiwa. Kabiji—kabiji Nashikwa bingi kutoma byobya bintu. Kabiji Naambile ku mulunda mutemwe dokotala, inge... “Kechi kujipo bikwabo nenyi?”

Kabiji aye waambile mba, “Amiwa kechi nalanguluka byobyo ne, Mulongo Branham.”

<sup>4</sup> Oo, kimye inetu kyo aishile nabyo, kyamwekele nobe, kapepo Mbena kubaisha jashi, bino, kyamwekele nobe kipimo kya mukono. Kyajinga—kyajinga... Amiwa kechi nakimonapo byavula byobya ne. Kabiji Nakwachiletu mona wami ne kukasa kyatunwa. Bino pa kupezhako kepo Namina.

<sup>5</sup> Bino pakino kimye, mu byonse bya kupeswapeswa, kabiji ne byonse byo napichilemo, Nasaka kusachila Nkambo pa kupimwa kwalumbuluka. Napichile, wanu aduleendi paseti; nakonsha kuya kuji konse mu kyaalo kya panshi Nkonakonsha kukeba kuya. Amiwa naipwizhe madokotala, bajinga basendwe basatu bayukisha bingi, abo, Na—Naketekela, mu Louisville. Kabiji Amiwa nebepwizhe, Naambile mba, “Bushe Amiwa nafika pa kipimo kyabulema kya teni paseti?”

<sup>6</sup> Waambile mba, “Obewa kechi ujipo nangwa na bulema buchche ne.” Waambile—waambile mba, “Obewa uji mu bututulu bwamubiji bwalumbuluka, musango uji yense.” Kabiji Amiwa namusachila bingi Lesa. Kwing'anyi mukwabo ko

kyakonsha kufuma kanatu kwi Taata Wamwiulu, monai, pa kwikala bibye?

<sup>7</sup> Kabiji aye waambile mba, “Byobe. . . Kwenda kwa byonse bya mumubiji obe bimwesa, mukachi, mba wimwanyike.” Aye waambile mba, “Tubishi twa bumi mu mashi tukyangye nangwa kutatula kulajika ne, nangwa kintu kiji kyonse ne.” Aye waambile mba, “Obewa uji mubututulu bwawama bingi, Mulongo Branham.”

Kabiji Naambile mba, “Kyawama, Amiwa njibingi nalusekelo.”

<sup>8</sup> Kabiji Najinga na jishuko ja kwisamba, kushimuna ku manase yense mu kipatala, kabiji ne dokotala uji yense, pa bya Bufumu bwa Lesa. Kabiji dokotala umo, Naketekela mba wafwainwa kwikala muno lukeelo luno. Kabiji Amiwa—Amiwa. . . Amiwa njina lusekelo pakuyuka mba mu inontanda mukiji bantu bawama, bantu beene, bantu bakonsha kwikala ne amiwa pa moba atanu, kasa bapesapesa mubiji yense, akyo kyakonsha kusendwa kape tuu nangwa fili aduleendi madola pa umo umo. Byo Bapwishishe, baambile mba, “Ke lubaji lwetu lwa kupana bukwaso ku mwingilo wa Nkambo, ye ubena kuuba.” Mwamona? Ee. Kechi pajinga nangwa. . . Waambile mba, “Kika, kitulenga buvu, nangwatu kwipuzha kana uji na kongole yetu.” Waambile, “Kwitulombelelatu milombelo atweba!”

<sup>9</sup> “Kabiji mukachi,” baambile mba, “twatainemo ng’umvwino imo yo twakonsha kubula kukwatakanya.” Kabiji Naambile mba. . . “Atweba. . . Kechi—kechi kimweka kwikala byobyoye ne. . .” Aye waambile mba, “Mwekelo ya pangye, obewa kechi washupikwa nangwa kukatazhiwa ne. Pakuuba,” waambile mba, “mukachi, muji ng’umvwino imo yo twakonsha kubula kukwatakanya ne.”

<sup>10</sup> Naambile mba, “Inge wakonsha kwikala papo mukimye kicheche, Amiwa nsakukubuula.” Kabiji Natatwile kwamba pa bimwesho. Kyajinga ke musango mu kwabo kwi abo. Abo kechi bayukilepo kintu nangwa kimo pa kikye ne. Amiwa ne babujile pa Baibilo. Pano Amiwa ne babujile kimwesho Nkambo kyo apele juba jikwabo, kabiji bajijile nobe baana bacheche. Baiketetu byobya na kujila. Kabiji Na. . . abo. . . Naambile mba, “Naketekela mba kechi mwakonsha nkumona nobe kintu kyabupompweshi nangwa kikwabotu ne.”

<sup>11</sup> Waambile mba, “Kechi kyakonsha kwikala byobyoye ne, Mulongo Branham. Naketekela kyokyo na muchima wami yense.” Aye waambile mba, “Bino pajitu kintu kimo kyo Nasaka kwamba: Anweba kechi muya ku sukuulu na kufunda byobyoye bintu ne.” Waambile mba, “Naketekela mba bifuma kwi Lesa Wabulume bonse.” Kabiji akya kyajinga basendwe basatu bakila mu Louisville, bobaji nabo bakila kuyuka. Kabiji, nanchi,

Najinga walusekelo pakyokyo, kabiji pa kuyuka mba kapepo Nkambo waswisha kubyala Lukunwa umo momwa.

<sup>12</sup> Yense manase, nesambile nanji. Abo, lukeelo lumo, pa kulupuka mu kibamba kya x-ray, Naambile kwi. . .Natajile pa mukote mwanamukazhi ka mulanda. Wajinga wakolwa bingi. Kabiji Natwajijiletu nakuya, nakuya poso byo Namutaine. Nalangulukile mba kape ubena kufwa. Kabiji Naambile mba, “Nasaka kukwipuzha jipuzho, nyenga.”

Aye waambile mba, “Ee, mwane.”

Naambile mba, “Obewa wi Mwinakilishitu?”

Kabiji aye waambile mba, “Amiwa ne wa ku kipwilo *kananga*.”

<sup>13</sup> Kabiji Naambile mba, “Amiwa nasaka kulondololapo bulongo.” Naambile mba, “Na—Nasaka kuyuka kana wi Mwinakilishitu, Mwinakilishitu mwine. Kyakuuba mba inge wakonsha kupita bushiya bwakako kalunga ka bumi, ne kuya ku Ntanda ikwabo, bushe obewa Wamutemwa nyi?” Naambile mba, “Wakonsha kine kupuluka nyi?”

Kabiji aye waambile mba, “Ee, mwane. Nakonsha.”

<sup>14</sup> Kabiji Naambile mba, “Les a peshe muchima obe nanchi. Nangwatu lubesha apupe byepi, obewa ujitu bulongo, kikulutu kibena kuya mu yekawa musango.”

<sup>15</sup> Kabiji inge twazhokoloka, muntanda mukiji bantu bavula bingi bawama.

<sup>16</sup> Bino, leelo, Naiya na kimwesho kyo Nsakwimubula palutwe kacheche. Kabiji Nasaka kwamba, patanshitu, pa Kyambo, mambo Naketekela mba Kyambo kyanema bingi, pakino kimye kyo kyakijisha kunema. Kabiji Nasekela pa kumona Charlie Cox, kabiji, mulongo, mulunda nami waimana popa, pamo. Mulongo, Amiwa kechi nalanguluka. . .Jeffries, Amiwa nakakalwa kulanguluka jizhina janji. Anweba bakwabo balunda bawama bafuma ku Georgia, bafuma ku mampuzha akwabo apusanapusana a mu kyaalo. Mutemwe wami wakala, Bill, waikala popa, Naketekela iye, lukeelo luno. Kabiji—kabiji bavula. . .Kabiji ne mulongo kufuma ku Georgia kokwa, bantu bapele yuwe suti. Anweba mwayukatu, awe—awe ye umo suti wakila mukuwama Amiwa ye mwala. Kyumvwanika bingi bulongo, kyawama bingi. Kabiji muji na kilumbululo kyabaya bingi kwi amiwa. Inge Amiwa ne mubuula kyamweka, ao moba acheche apita, kwi amiwa, mwakonsha kumona kyo Nalangulukila mba kiji na kilumbululo kyabaya kwi amiwa.

<sup>17</sup> Bino, Naketekela, inge Nkambo waswa, Nasaka kubaishako kondo pakatampe kukila kunyuma, mu bumi bwami. Mambo, Natana kuuba mba kiji. . .Mambo, Nakonsha kufwa leelo. Kokuba mba anweba kechi mwayuka ne. Kupimwa kwami kwa-mukyaji kabiji ne bintutu bikwabo, ma x-ray sikisi

apusanapusana, ee, kutanwa mba bututulu bwapwijijika, kyamwesheshe kuuba mba Amiwa najinga . . . mututulu byonka byakonsha kwikala muntu uji yense, muntu panopantanda. Nanchi Nasata bingi pa kikye. Bino, bintu byonse, ne pabyobyobyonse, nasata kabiji na musachila Lesa, pa Byonji, byo Nakatekela mba Aye ukindama mu mwingilo Wanji, kechi kyajinga mambo a kyokya Aye kyo amwesheshe ne bino pachechetu kasa kikyanyge kumweka ne, mwamona, kindengela amiwa kwikala wa lusekelo bingi.

<sup>18</sup> Pano, Nalanguluka, bufuku buno . . . Kijitu bulongo ne anweba? [Mulongo Neville waamba mba, “Ee, mwane.”—Waku.] Wetu—wetu mulongo wawama ke—ke muntu umo wabula kwitemwa, ye—ye Mulongo Neville. Kabiji inge anweba bamo mwajinga kuno Pamulungu ne kumvwa aya mbila yawama bingi yo aletele, mu “mulondo wa manyi,” yajinga ya- . . . imo mbila yawama bingi yo Nakyumvwapo kala, yoyaletete Mulongo Neville, kupichila mu Mupashi Wazhila, pa Mulungu wapita, kujije jitanga jicheche ajo Lesa jo abungizha pamo.

<sup>19</sup> Kabiji inge kyakonsha kwikalatu bulongo, kyamutokela ku muchima Nkambo, kabiji ne Mulongo Neville ne kipwilo, Nasaka kwamba jibiji bufuku buno kabiji ne kutatula ndonda yalufunjisho, nobe, Pakimo bufuku . . . Amiwa natazha mukuuba mba, Pamulungu bufuku, ne Pakisatu bufuku, kabiji Pamulungu walondelapo, ndonda yalufunjisho yo Natanga.

<sup>20</sup> Amiwa inge kechi nakonsheshe kwikala momwa mu kipatela ne. Bino bajinga bingi bulongo kwi amiwa, bapele kibamba pa mutengo wa kibese kimo-pabisatu wa mutengo. Kabiji nanchi Nasendele ma Baibolo ami, mabuuku ami, ne kutula pa mwanya, kabiji ne kwikala ponkapa, kabiji ne kutola ma Baibolo ami ne byonse kasa byazhokoloka. Kabiji Najinga na kimye, poso byo baletete manyi akasita momwa. Kimye kyami kyawama po kyapwijile ponkapa. Amiwa—Amiwa popo napwijile ponkapa. Bino, Mulongo Pata, Najinga wakolwa bingi. abyabintu, Amiwa kechi nakonsha ne. Kabiji, bino Najinga na kimye kyabaya bingi, mu kimye kitanshi kya pa fili nangwa moba foolo. Naikelenga na kimye kyawama bingi.

<sup>21</sup> Kabiji Nafunjilenga mu Buuku wa Efisesa. Oo, akwa kwikala pamo kwa Kipwilo! Kabiji Nalanguluka mba ke kintu kyawama bingi.

<sup>22</sup> Kabiji—kabiji inge obewa, pano, inge uji na kipwilo ko uya, twajijilatu kuya ne kwimana pa kifulo kyobe kya mwingilo. Pakuuba inge kechi uji na kipwilo ne, kabiji wakonsha kutemwa kubwela bufuku buno, kabiji ne Pakisatu bufuku, kabiji ne Pamulungu bufuku, Nakonsha kutemwa kusenda, bufuku buno, Buuku wa bu 1 wa Efisesa, kabiji ne Pakisatu bufuku, kyapitala kyabu 2 kya Efisesa, kabiji Pamulungu walondelapo, kyapitala kyabu 3 kya Efisesa, mu kwikajika Kipwilo mundonda. Anweba

mwayuka kyo Nalumbulula, Ke—Ke kwikajika, mu kifulo kyakyo. Kabiji Naketekela mba ke kya-kushimika, ku Kipwilo.

<sup>23</sup> Amiwa kechi . . . Amiwa—Amiwa mbena kwamba kikye ku bonka beya ku Branham Tabernacle.

<sup>24</sup> Kabiji inge umo mwi anweba balongo batemwe . . . Amiwa nayuka anweba bamo, Nalanguluka mba, baji na kupwila. Mulongo wetu wamuheche uji ku Sellersburg, kabiji—kabiji ne bakwobotu bapusanapusanana, baji na kupwila. Bino, monai, ako ke kupwila kwa kusangululwa. Anweba tanwaiko kukoko. Abo ke bakalume bakwa Kilishitu, bakitwala banabalume baimana pakachi, abo balupukamo. Kimye ne bipwilo byabo bene byakaine Bukine, kabiji ne bintutu bya byobya, bafumineko ku bya byobya. Kabiji Lesa wibechile ku mwingilo. Ee, mwane. Amiwa—Amiwa komoka muntu . . . Amiwa kechi nakonsha ne kulanguluka jizhina ja mwanamulume ne. Bino aye ke mulongo ukitwala, wawama, mulunda uji—namwekelo yalamba, kabiji n mukazhaji wabutemwe ne baana.

<sup>25</sup> Kabiji—kabiji Mulongo Junie Jackson wajikupwilanga konka kokwa, naye ke mukwabo wawama, ke kipe kyamunema kya lusa lwa kwa Lesa. Kabiji umvwe baji na kusangululwa mu bipwilo byenu, anweba mwakonsha kuyakotu, mambo aya ke yenu . . . akyo kyokintu kyakuba. Mambo, anweba kechi mwayuka ne, wafwainwa kwikala ndengamambo waiya ku kitapisho, kabiji wakonsha kongolwa kutangijila muntu kwi Kilishitu, akyo kikekala ke futo yobe kubushiya bwamukola.

<sup>26</sup> Akwe ke kufunjishatu ne kwikajika kipwilo mu ndonda, kuno ku tabernacle, kupana bukwasho byo tubena kuya kulutwe.

<sup>27</sup> Bino, Amiwa kechi najikusenda koloko yami ne, nanchi muntu umu usa kumwenangako koloko. Doko wamwesa amiwa, uji nayo, nanchi, mulongo wami. Nanchi pano . . . [Mulongo Edgar “Doko” Branham waamba mba, “Amiwa kechi nsakukupingula pabaya ne,” kabiji wapana koloko yanji kwi Mulongo Branham—Waku.] Anweba kechi musakundipilisha pabaya ne? Kijitu bulongo. Kyawama, pano, akyo kijitu ulongo. Kyawama, pano, Amiwa kechi naketekela mba akyo kintu kijibulongo ne, kyakutatwilapotu. Nanchi . . . [“Nakusachila. Nsakubulapo muntu umu na mambo a obewa.”] Pano, oo, oo, sh, sh, sh, sh. [“Amiwa najikukwachijila mapeni teni, pa juba ja kusemwa kwami, lukeelo luno, pakuuba mba ne mumvwizhekotu bulongo.”] Bushe ne anweba? Pano akyo ke . . . Aye koloko yauba bingi bulongo nanchi, Doko. Waambile mba wasungile mapeni teni, pa juba ja kusemwa kwanji, pakuuba mba ang’umvwisheko bulongo, mambo kuji babiji nangwa basatu pakachi kanji ne Amiwa. Nanchi mwakonsha kumona Amiwa poji, mujishinda. Bino, oo, akyo kechi kijipo

nalukatazho nangwa pacheche ne, kwi amiwa. Pano, Amiwa kechi nsakwamba kimye kyabaya ne.

<sup>28</sup> Pano, inge muji benyi mukachi ketu, kine twakeba kwimutambulwila na michima yetu yonse. Anweba mwatambulwila bingi pa uno tabbanako mucheche. Atweba kechi tuji na kishimikwa kyabaya ne. Kiji mumutachi wakushimika, kechi mpuzha yabaya ne, bino ke...Akino kyakila mukonaika. Kabiji tusakweseka kushimika kipwilo kicheche kyawama muji pa kwikala pawama, katatakatu inge twa...aye Nkambo usa kwituswisha kwikyuba. Kabiji anweba bavula mwabikako bulume ku kikyeye, kabiji twasata bingi pakyokyo.

<sup>29</sup> Pano Nasaka kuzhikula pamo ne amiwa, lukeelo luno, pa kutanga, mu Samwela Mutanshi mu kyapitala kyabu 8, kabiji ne kutatwila nobe pa, twayai tutatwile nobe pa veeleshi 19, maveeleshi abu 19 ne 20, kapepo, pakibaba kicheche kyakwitupa mutwe.

<sup>30</sup> Kabiji pano, byo mubena kwikitambula, kabiji kasa tukyanye...Tusakwikitanga, kabiji pano twakeba kuya mu milombelo. Kabiji kujipo byakukabila lukeelo luno, ne kwamba mba, "Muvulukeko"? Mukusambakana kwetu, milungu ibiji yapita, nangwa isatu, kimye kyo Najinga na kupwila...Kwamba mba, atweba...

<sup>31</sup> Nangwa byonkabyo, kimye kyo mubena kuzhikula, kupwila kukatapa ku Chautauqua, pa 6. Tubena kuketekela kwikala na kimye kyawama bingi, Middletown, Ohio. Anweba muji na bimye byakukokoloka bibena kwiya, mwaiya. Kabiji kukekala kubungana kukatampe, konkatu ku mukola, ako, oo, atweba... kusapwila konse komukeba kumvwa. Bonse bakekalako peulune-panshi konka ku mukola, basapwishi, pajuba pajuba lukeelo kelo, juba jonse mute ne bufuku. Nanchi bonse bakapwilatu pamo. Ke mpuzha pakubungakena pabaya bingi, pabaya kukila pa Silver Hills, bimye byavula. Kabiji—kabiji paji mpuzha yabaya pakonsha kwikala bantu pakachi ka eiti ne teni sauzande. Kabiji kimye kyonse payula bantu. Twikala na kimye kyabaya bingi ku Ohio.

<sup>32</sup> Kabiji mukote Mulongo Kidd, ye Naile na kulombelela, lukeelo lumo. Anweba bonse mwavuluka byo nemubujilenga, papita milungu isatu? Badokotala bamupeletu ma awala tweti-foolo, kwikala na bumi. Aye wakonsa kabiji ubena kwenda. Waambwile Kinembelo, lwimbo ye akonsha kubula kwimba. Kabiji byo Natwelele mukachi kabiji na mutajile, lukeelo lukwabo, ne shawelo mucheche ye bamupomba. Nafumine kuno pepi noe fili nangwa awala foolo kasa jikyanye kusama ne, pakuuba mba Mfike kwi aye. Baambile mba usakufwa aja jonka juba; kaasa wa banabalume.

<sup>33</sup> Kabiji wanji wawama, mucheche mubiji, mukazhi wakala, wawashishenga byakumvwala pa maseti fifite pa juba; kutatula kumanyashi, poso kufika ne bufuku, pa malipilo maseti fifite, pakuuba mba mulume wanji atwajijile nakusapwila monse monse nobe musapwishi. Wasapwijile kusangululwa kwa milungu-ibiji, kabiji ne kutambula bupe, watambula maseti eite.

<sup>34</sup> Bino Nebamwene kasa baikala kokwa lukeelo lumo, abo bachepe mibiji, bakote mulume ne mukazhi, bacheche mibiji balume ne mukazhi, byonkabyo, kasa baikala byobya, kabiji shawelo mucheche wapombwa ku mapuzhi anji. Kabiji umo ye baitabizhe, wa myaka naite-tuu, kasa bakijimotu ne maana, kabiji ba Pentekositi benebene, kasa baikala byobya, mwayukatu. Kabiji Naambile mba, “Mwayuka anweba bakote kyo mwaikela papo nyi? Babena kupembelelatu bwato kwiya.” Kyo kyonka. Mingilo yabo, yo baingila, awa—awa mwingilo ye baingila, kabiji pano benengezha kuya na kutambula bilambu byabo.

<sup>35</sup> Kabiji Naambile kwi Mulongo Chev, kuuba mba kwi Mulongo Kidson...Kidd, alwa lukeelo, “Obewa ukatanwa kupwijilo ya ku Chautauqua.”

<sup>36</sup> Wangichile keshu, amba, “Amiwa...Amiwa nkatanwako, Mulongo Branham.” Akyo kyawama.

<sup>37</sup> Kupwila kwavula, na mambo a nyingijilo yami ibena kwiya yakatataka. Mulongo umo, mulongo wa ku Baptist waimana papo, mwanawanji wa mukazhi, wa myaka-yabusongwakazhi, wajinga nobe na byubilo bingi. Kabiji namwambijile mba, “Nakupa mwaana obe wamukazhi na mambo a Nkambo Yesu,” lukeelo lukwabo. Kabiji byo aile kunzubo, wapuluka. Kabiji mukwabo lukeelo luno kuno, usakubatizhiwa ne kutwajijila.

<sup>38</sup> Kabiji mwanamulume, Mr. Sothmann, mulunda nami ufuma ku Canada, bako-banji-babakazhi bajinga mukifulo kya kufwa, naambile mba, “Inge wafika ukatana bako-bobe-babakazhi, bakosa, babena kuya na kukosa, kijitu bulongo.” Abyo byokyajinga. Kabiji kijitu...bantu babena kwiyatu. Kikijitu mu ntapilo yakyo, kibena kuya nakukoma. Bino, oo, tubena kuketekela byakilapo, byavula kukila pa byonse. Tuji mu moba atama kabiji apelako, bino kasa kiji kimye kyawama.

<sup>39</sup> Pano muji na Baibolo wenu, pa kutanga, kyapitala kyabu 8 mu Samwele? Kabiji Najikulaya Gene kwikala kokwa kunyuma, amba alekonde byonse bye. Potwatatulatu, mu kupwila kwetu.

*Nangwa byonkabyo bantu bakaine kukokela jivi jakwa Samwela; kabiji baambile mba, Ine; pakuuba atweba tubena kukeba mfumu wakwitutangijila;*

*Pakuuba mba atweba...twesakane pamo... na byaalo, mikoka ikwabo yonse; kabiji namba mfumu wetu aketuchibilengako mambo etu, ne kwikutangijilako, ne kwitulwilako makondo etu.*

*...Samwela waumvwine byonse bye byambo  
byaambile bantu, kabiji...wakamupitulukijilemo  
Y<sup>EHOBA</sup>.*

*Ne aye Y<sup>EHOBA</sup> wamwambijile Samwela, Bomvwe jivi  
jabo, wibape ne mfumu. Kabiji Samwela waambile bena  
Isalela mba, Pano bwelai anweba bonse ku mizhi yenu.*

<sup>40</sup> Pano inge Nakonsha kweseka kusala kufuma papo, lukeelo luno, kyo Nakonsha kutela mba mutwe, pa mamineti achechetu aji kulutwe, Nakonsha kutemwa kusala mutwe wakuuba mba: *Mfumu Ye Bakana.*

<sup>41</sup> Kyajinga kimye, nobe bimye bikwabo, abyo bantu kechi bakeba Lesa kwibatangijila ne. Abo bakeba butangi bwabo bene. Kabiji aje jishimikila lukeelo luno...Kabiji umvwe mwaya kunzubo yenu, kyakonsha kuwama inge anweba mwatanga kibaba kyonse. Kyajinga mu kimye kya—kya moba akwa Samwela, muntu wakwa Lesa, ngauzhi. Kabiji wajinga muntu waoloka, kabiji muntu wawama, wamushingi, wayukanyikwa, wakishika kabiji wabukine na bantu, kechi wakwibajimbaika ne, kabiji kechi kwibabulapo kintu kikwabo ne kanatu **ABYO BYOBYAAMBA AYE NKAMBO.**

<sup>42</sup> Bino bantu bafikile pa kifulo kyakuuba mba bapipule iye nyingijilo. Abo batajile pa bena Filisitiya, ne bena Ameleki, Amoli, bena Hitti, kabiji ne byaalo bikwabo bya panopanshi, kabiji bamwene mba baji na bamamfumu bebatangijila, kabiji ne kwibalama, kabiji ne kwibatangijila, ne kulwa makondo abo, ne bintutu bikwabo. Kabiji akye kyamwekele nobe Isalela wakebelenga kwipashang'anya abo bene nobe babo ba mamfumu, kabiji nobe babo bantu.

<sup>43</sup> Bino kechi byokyajinga ne, mu nkulo yami, nkebelo yakwa Lesa mu bantu Banji kechi kwikala nangubilo ya muntanda ne, nangwa kulamwa nangwa kutangijilwa nobe bantu ba muntanda ne. Lesa bantu banji, kimye kyonse, bekala ba—ba bantu bangi, bantu bapusanakotu, ba—itwa, ba abanwa, kabiji bonse pano bapusanako mu byubilo byabo, mu mashinda abo, mu musango wangikelo yabo, kukula pa byobya biji na bantu ba muntanda. Nkebelelo yabo ya bintu, kabiji ne byonse byakwipetapeta, ikala kimye kyonse yapusanako ku byobya bikeba bantu ba muntanda.

<sup>44</sup> Kabiji bantu bena Isalela baishile kwi Samwela ne kwamba mba, “Pano, obewa ubena kukota, kabiji baana bobo kechi benda mu mashinda obe ne.” Mambo, kechi bajinga babukishika nobe Samwela ne. Bajinga ba mazhika kanwa kabiji bakusenda mali. Kabiji baambile mba, “Samwela, bansongwalume bobo kechi baji nobe obewa ne, nanchi twakeba obewa witukebele mfumu, kabiji ne ku mushinga manyi, kabiji witulenge kwikala bantu baji nobe bantu bakwabo ba muntanda.”



45 Kabiji Samwela waesekele kwibabula mba akyo kechi kyakonsha kwingila ne. Aye waambile mba, “Inge mwauba kyokyo, kintu kitanshi mwayukatu, mukatana kuuba mba uketa baana bene bonse kufuma mu nzubo enu, ne kwibalula kwikala ke bashilikale, bakulondela makalaki anji, kabiji bakusenda makebo ne mafumo. Kechi kyonka kyotu ne, kabiji uketa baana benu babakazhi, kwikala bakulenga shinkwa, kabiji ne kwibafumya kwi anweba, kuya na kujisha bashilikale. Kabiji,” amba, “kufumyako byobyoy, ukatambulanga musoko kufuma kwi anweba, wa kajo kenu, kabiji ne byonse byakumwenamo byenu. Aye ukatambula musonko mu byonse byo, ne kulenga makongole akafulumende, ne bikwabotu, abyo bikakebewanga kulipilwa.” Aye waambile mba, “Naketekela anweba bonse, pamo, mubena kulenga kilubo.” Bino umvwe. . .

46 Bantu baambile mba, “Bino twakeba kwikala nobe bantu bakwabo bashala.” Pajipo kintu kimo pa banabakazhi ne banabalume ne, bakeba kwipasha umo ne mukwabo. Kabiji pajitu muntu umo waikala na bumi panopantanda awo wajinga kyakumwenako kyetu, kabiji awa wajinga Iye witufwijile atweba, Nkambo yetu ne Mupulushi, Yesu Kilishitu. Aye wajinga kyakumwenako kyetu kyalumbuluka byo twafwainwa kwikala, kimye kyonse wajinga pa mwingilo waba Shanji, kabiji ne kuuba kyokya kyaoloka.

47 Kabiji nangwa Samwela waesekele byepi kukajikizha bantu, batwajijiletu na kumulondela, mute ne bufuku, “Atweba tuena kukeba mfumu. Atweba tubena kukeba muntu. Atweba tubena kukeba muntu ye twakonsha kwambila mba, ‘Awe ye wakwitutangijila.’”

48 Kabiji akyo kechi kyajinga kyaswa muchima wakwa Lesa ne. Kechi kyajinga kyaswa muchima wakwa Lesa ne, nangwa kechi kikekala kyaswa muchima wakwa Lesa ne, kya kuuba mba muntu umo atangijile mukwabo. Lesa ye utangijila muntu. Lesa ye Kalama wetu, Mfumu wetu.

49 Kabiji kiji bingi, bulwanyani bwavula bingi mu buleelo, mambo wamweka nobe ujitu na mulanguluko umo. Abo kechi bamweka nobe bakonsha kukwatakanya kuuba mba Lesa ukilama bantu ne luno ne, mu kifulo kya muntu kulama muntu ukwabo.

50 Nanchi basajijile abo bene muntu watelwa mba Saulo, wajinga mwana wa kwa Kishi. Kabiji wajinga muntu wayukanyikwa, muntu wamushingi. Bino aye wayijile monka mwaila bantu, mambo wajinga mukatampe, walepa, wamushingi, kipimo kya mwanamulume. Akyo Kinembelo kyaamba mba mutwe wanji ne mapuzhi byajinga peulu ya muntu yense mu Isalela. Aye wajinga na mwekelo-yabumfumu, kabiji wajinga walamba kilungi kyanji. Aye wajinga wamaana kabiji wakila pakipimo kyabu muntu.

<sup>51</sup> Pano, awo ye musango wa muntu bantu ye batemwa kusala leelo. Bantu kechi bamweka mba batondwa na jishinda Lesa jo abikilamo Kipwilo Kyanji ne, kulamwa ne kutangijilwa na Mupashi Wazhila. Bakeba muntu umo, mwanamulume umo, dinominesheni umo, bantu bamo kutangijila Kipwilo. Kyakuumba mba, kechi benengezha kwipana bumuntu bwabo bonse mu kuboko kwa Nkambo ne, kwikala ba bumupashi, ne kutangijilwa na Mupashi Wazhila. Basaka muntu umo kwibobilako bupopweshi, muntu umo wakwibabuula mwakwikyubila, kabiji ne pa byonse.

<sup>52</sup> Nanchi awe muntu wamwekelo nobe wafikilamo bingi bulongo, mambo wajinga muntu wafunda.

<sup>53</sup> Kabiji kijitu pamo nobe leelo. Twatemwa kusala bantu bayewo musango, ne atweba, kutangijila bipwilo byetu, kutangijila Kipwilo kya Lesa. Kafwako nangwa kyatama kyo Nakonsha kwamba ne, pakuuba mbena kukebatu kwamba kintu kimo, amba: kechi kiji, kechi kyajinga, kabiji kechi kikekala kyaswa muchima wa Lesa ne, pakuuba mba kikale byobo. Lesa ye utangijila bantu Banji, ne kulama muntu umo umo.

<sup>54</sup> Kabiji twatana mba awe mwana Kishi, muntu mukatampe, kabiji—kabiji ne kimino kyanji, kabiji kyanji. . . Aye wamwekele kwikala waitabilwa mu bantu, kyakuuba mba mukukumba wanji wamwekelenga bukatampe. Kabiji ne kisocho kya bufumu ku mutwe wanji, wajinga peulu ya bantu bakwabo, byo aendelenga, wamwekele kwikala nobe—nobe kipe kya munema ku bufumu bwa mu Isalela. Mambo, bamamfumu bakwabo, ba mu byaalo bikwabo, balangulukile mba, “Monai muntu wamusango ka!” Byo bakonsheshe kumutongola munwe wabo ne kwamba mba, “Monai kuno, mfumu mukatampe yetuji nanji! Monai muntu mukatampe ubena kwitutangijila!”

<sup>55</sup> Kabiji ke kyabulanda pa kwikyamba, bino ke kyakine leelo na kipwilo, batemwa kwamba mba, “Kafunga wetu kechi muntu wamilangulukoko-icheche ne. Aye ke muntu mukatampe. Aye wapwisha masambijilo kufuma ku Hartford,” nangwa sukuulu umo wa mambo awama. “Aye uji na madigili foolo kufuma ku *kananga-ne-kananga*. Kabiji ke muntu wawama bingi kukwatakana na bantu.” Abyo byonse byakonsha kwikalatu bulongo, kabiji biji na kifulo kyabyo. Bino jishinda ja Lesa ja Kipwilo Kyanji ke kutangijilwa na Mupashi Wazhila, kabiji na Mupashi Wanji.

<sup>56</sup> Bino abo batemwa kwamba mba, “Atweba twiiba mu yuwe dinominesheni mukatampe. Twatatwile kunyuma mu moba atanshi akutatula, kimye kyo twajingatu bacheche, bantutu bacheche, kabiji bakepelwa. Kabiji pano twavula poso twafika pa kipimo kya madinominesheni abaisha ajiko. Atweba tuji na masukuulu awamisha, kabiji ne basapwishi bafunda bingi. Atweba tuji na mabumba amvwala-bulongo. Kabiji bonse

bafunda ba mu siiti wetu batanwa ku dinominesheni wetu. Kabiji tupana bya bukwasho. Kabiji tuuba mingilo yawama, kabiji ne byonse byo.” Kabiji kafwako nangwa kimo, Lesa kechi waswa ne, amba Amiwa ng’ambepo kyambo kyatama pa kyokyo ne, mambo byonse byo byawama.

<sup>57</sup> Bino, nangwa byonkabyo, kechi kyo kyaswa muchima wakwa Lesa ne mba muntu atangijile muntu mukwabo. Lesa watumine, pa Juba ja Pentekositi, Mupashi Wazhila kuuba mba atangijilenga mu michima ya bantu, kabiji ne kutangijila bumi bwanji. Kechi kyatongwelwe mba muntu atangijile muntu mukwabo ne.

<sup>58</sup> Bino twatemwa kwamba kyokyo. Ke kintu kyawama bingi inge twakonsha kwamba mba atweba twiiba ku kabungwe kakatampe.

<sup>59</sup> “Obewa wi Mwinakilishitu nyi?” Abyo byo Nafikijile pa kikye kibaba, kimye kyo Najinga mu kipatela. Kabiji Nakonsha kwipuzha umo mba, “Obewa wi Mwinakilishitu nyi?”

“Amiwa ne wa ku *kananga-ne-kananga*.”

“Obewa wi Mwinakilishitu nyi?”

“Amiwa ne wa ku *kananga-ne-kananga*.”

<sup>60</sup> Kabiji manase wamucheeche mubiji waishile kulubaji lwa mwanya, konka ko Natangilenga Baibolo, kabiji wajinga—wajinga manase wakatata wapyangilenga. Kabiji waambile mba, “Muji byepi.” Waambile mba, “Naketekela mba obewa wi Rev. Branham, uji muno na kupeswa-peswa mubiji yense.”

Naambile mba, “Yami iye.”

<sup>61</sup> Kabiji waambile mba, “Lekai Nemushinge nyuma yenu, pakuuba mumvweko bulongo na binyi?”

Kabiji Naambile mba, “Mwakonsha kwi kyuba.”

<sup>62</sup> Kabiji kimye kyo shingilenga panyuma yami, waambile mba, “Ng’anyi dinominesheni ya kipwilo koutanwa?”

<sup>63</sup> Kabiji Namukumbwile mba, “Oo, Amiwa ne wa ku dinominesheni ya kala kene ijiko.”

Kabiji waambile mba, “Ng’anyi dinominesheni ayo?”

<sup>64</sup> Naambile mba, “Ke yooya yabungizhiwe ntanda kasa ingye kubungizhiwa.”

<sup>65</sup> Kabiji, “Oo,” waambile mba, “kika? Amiwa kechi Naketekela mba nayuka kyokyo ne.” Waambile mba, “Amiwa ne wa ku kipwilo kya *kananga*. Nanchi konka kabungwe?”

<sup>66</sup> Naambile mba, “Ine, maama. Akyo kyajinga pepi nobe myaka bitota bibiji byapita, aka kabungwe. Pakuuba ako kabungwe katatwile kimye bantanda bakumakya po baimbile pamo, kabiji ne baana ba Lesa babjikile na lusekelo, byo

bamwene kwiya kwa Mupulushi na kunkula mutundu wa muntu.”

<sup>67</sup> Kabiji walekele kushitaula nyuma yami. Kabiji Naalulukile pacheche, kukwe *ku* lubaji, pakuuba mba inetu ashitaula. Kabiji wafumine kwipi na Corydon, kukwe. Twatatwile kwisamba. Kabiji waambile mba, “Mwane, Amiwa kimye kyonse naketekejile mba inge Lesa wajinga Lesa, Aye ukijitu Lesa pano, leelo, byonka byo Ajinga mu moba akala.” Waambile mba, “Nangwa kipwilo kyami kyakanyishatu kyokyo, bino Amiwa naketekela mba kyo kya Bukine.”

<sup>68</sup> Kabiji Naambile mba, “Obewa kechi uji kwalepa na Bufumu bwa Lesa ne, mwanamukazhi mwanyike.”

Aye waambile mba, “Inge Aye wajinga walubuko, bushe Aye kechi ukiji walubuko nenyi?”

Naambile mba, “Aye kine byobyo aji, nyenga yami.”

<sup>69</sup> Pakuuba muntu ukeba kutangijila, kabiji kutangijila muntu mukwabo. Kabiji muntu ukeba muntu mukwabo kumutangijila. Aye kechi ukeba Lesa kutangijila ne.

<sup>70</sup> Nachi awe mwaana Kishi, Saulo, jizhina janji, wajingatu mukumbu wa kyokya kyo bakebelenga, muntu wanemekwa bingi kuntanda. Kabiji aye... Oo, aye wibatangijilengatu ku makondo abo, kabiji ne bikwabotu. Bino, nangwa byonkabyo kechi jajinga jishinda ja Lesa ja kubilamo bintu ne. Lesa wakebelenga ngauzhi Wanji wakala wakishika kwibatangijila, kabiji ne kwamba Byambo Byanji kwi abo.

<sup>71</sup> Pano, leelo, munkulo yetu ikatampe ya bipwilo yo twikalamo, atweba, Nalanguluka mba, kabiji naketekela kikye na muchimo wami yense, kuuba mba twayatu mungi-na-momwa Lesa mo etutongwejile kubila. Abya Byambo bya Mupulushi wetu byapeleleko byajinga mu Mako 16. Byaamba mba:

*Yainga panopantanda ponse, na kusapwila mambo awama ku kilengwa kyonse.*

*Aye waitabila ne kubatizhiwa ukapuluka; . . . pakuuba aye wabula kwitabila ukazhatwa.*

*Kabiji bino biyukilo bikebalondelanga baitabila; Mujizhina jami ba kapangilamo ba demoni; bakamba na jimi ipya;*

*Kabiji inge abo ba katola milolo; nangwa . . . kutoma . . . bintu bifwana, kechi byakonsha ne kwibabeleka abo; kabiji inge abo . . . bateteka maboko abo pakokolwa, . . . bakatambula lubuko.*

<sup>72</sup> Kechi kujipo muntu, kechi kujipo mwaana wa kwa Kishi, nangwa mukwabo ne, wakonsha kuuba kyokyo kusa ya butangi bwa Mupashi Wazhila ne. Bino twalenga ma sukuulu, twalenga

masukuulu a mambo awama, kabiji twalenga tubungwe, pa—pakuuba mba bifikilemo, kabiji ne kumweka nobe ntanda yonse.

<sup>73</sup> Pano, Muoashi Wazhila ye wajinga Tangi mu kino kyaalo. Kino kyaalo kyatangijilwanga kimye kya kunyuma... kimye kyo banembele lubulang'ano lwa bwanabwabene. Kabiji mwajinga kipona kikwabo kyabikwangako. Kechi pajipo nangwa kintu kimo kyaluzhinauko mu milanguluko yami ne bino Mwaana Lesa ye waikala pa yewa tebulu, kimye kino kyaalo po kyaimikilwe pa bishinakata bya bwanabwabene bwa bupopweshi kabiji ne kukasuluka kwa bonse, kabiji kyaimajile Kyambo kya kwa Lesa kya Peenape.

<sup>74</sup> Pakuuba twaonauna kyokyo. Mapolitikisi; twavotelamo bantu momwa, kupichila mu lupoto ne kupotolola, kabiji ne milaye yabubela. Posotu... Kyaalo kyetu, kabiji mapolitikisi etu, ne nsambu yabumulwila ntanda, nabyo byaonaika poso bya—byamvwangakana na komyunizimu kabiji ne misango yonse ya nkebelo ya bantu.

<sup>75</sup> Kabiji bimye byavula twita bimye bya milombelo, umvwe kabungwe ka byaalo byonse kakumana, kabiji momwa... nangwa pakwikala na misambo. Kabiji mu kimye kimo, kimye kikatampe, katatakatu, kechi kwajingapo kwita milombelo ne. Twakonsha kupwisha byepi makatazho kwakubula milombelo? Twakonsha kuketekela byepi, mu kyaalo kyonse kya panshi, kuba kintu kwakubula butangi bwa Mupashi Wazhila?

<sup>76</sup> Bino lekai ng'ambe kikye na butemwe ne namushingi ku kyaalo kyetu ne kumbandela yetu, kabiji ne ku kyaalo pabyobyapa po kyaimena: Twakana Tangi wetu, Muoashi Wazhila, kabiji kupichila mu mapolitikisi a onaika byaletamo bantu ba milanguluko ya luwakana. Kabiji inge mwakonsha kutajisha ne, bakoba kilubo kimo kileta lufu, ponka pano, ke mambo akuuba mba bantu babena kukeba bantu kutangijila.

<sup>77</sup> Kyotubena kukeba mu muzhi mukatampe wa United States, nobe ndamakyalo, kyotubena kukeba mu Kongolesi, kyotubena kukeba mu bishimikwa byonse bya buchibishi bwamambo, ke bantu bepana bumi bwabo kwi Lesa, kabiji bayulwa na Mupashi Wazhila, kabiji batangijilwa na ndonda ya Bulesa Bwanji. Bino, mukifulo kyakyokyo, twasala bantu bafunda, bantu baji na “misango ya bulesa, kabiji ne kukana bulume bwa Lesa,” bantu babutushi, kabiji bimye bimo bakila mukutama ne pakyokyo, bo twaleta mu nyingijilo ya bya mapolitikisi, mu kyaalo kyetu.

<sup>78</sup> Kechi kyonkakyotu ne, pakuuba ne mu bipwilo byetu. Bipwilo byetu byaonaika ponka pa mambo kuuba mba atweba, tusala bakafunga betu bakwitutangijila, twaya ku masukuulu a mambo awama kabiji twasala bantu babilobo bamaana a kufunda, bantu bajimuka bingi mu milanguluko, bantu baji na byakufunda, kabiji bayuka kumvwangakana mukachi ka bantu, kabiji ke bantu bakatampe mungikelo ya kikalankulo,

pakyokyo kechi Amiwa njipo na kintu kyatama kya kwambapo ne. Bantu baji na lusa mung'endelo yabo, batako muchima musango yabo ya bumi, kabiji ne byubilo byabo mukachi ka bantu bakwabo, kabiji mukachi ka bantu, banabalume mu mingilo yabo, mukyokyo Amiwa kechi nakonsha kwambapo kyatama ne. Lesa kechi aswishe mupashi wami kwikala watama byobyoyo ne. Bino, nangwa byonkabyo, akyo Lesa kechi kyo etusalulwijile ne.

<sup>79</sup> Ke butangi bwa Mupashi Wazhila: Kilishitu mu muchima wa bantu. Bavula ba mubobo bantu bafunda bemana kupulupiti wetu bakana kutanwako kwa Mupashi Wazhila. Bavula bakana kutanwako kwa lubuko lwa Bulesa kabiji ne Bulume bwa Mupashi.

<sup>80</sup> Natangilenga sawakya, kesha, Naketekela byo kyajinga, byavula bya mu mapepala abyambo byanungwanungwa kufuma kwi Jack Coe, mulobe Jack Coe, aye...umo waboba bo naitabizhe kwi Nkambo Yesu, awo wajinga mwanamulume kilobo, mu juba janji. Kabiji bamwipwizhe, monka mu Florida, mambotu akwipuzha mw'anyike amba afumye byela byakwendelako ku mikupa yanji, kabiji ne pakwenda kukilang'anya ku pulatifomu. Kabiji ponka pa kuuba bibye, mwanyike waendele kupita ku pulatifomu, bulongotu, kabiji waponene byo afikile ku bainanji. Byonse byajingatu biteyo bya mulwanyoni wa Kilishitu, awe mwanamukazhi wakyanyike ne mulume wanji batwajile mulongo wetu kilobo mu bije bya ntanda.

<sup>81</sup> Kabiji mu kifulo kyakuuba mba kipwilo kyonse kimane kulubaji lwa kwa Mulongo Jack, mu kimye kyakuuba mba muntu yense wa kipwilo utongola pa Jizhina ja Yesu Kilishitu inge waimene kulubaji lwanji, bukilobo, muntu yense wita pa Jizhina ja Nkambo Yesu wafwaijilwe kufukamina mu manungo abo mu milombelo, bino, mu kifulo kya kuuba kyokyo, mitwe ya mapepala a byambo, umo wa dinominesheni wetu mukatampe waambile mba bakwatakana maboko na batushi, na kuzhachisha, amba bamukase Mulongo Jack Coe. Mwakonsha kulanguluka kipwilo, kiitela akyo kine Jizhina ja Kilishitu, amba kyakonsha kukwatakana na batushi, na kuzhachisha muntu wabulesa awo waesekelenga na muchima wanji yense kwimenako Baibolo? Bino be kyubile.

Kabiji bino Mulongo Gordon Lindsay ye wamupulwishe.

<sup>82</sup> Kabiji awa chibishi wamambo wabula kwitabila byo aambile mba, "Awe muntu mujimbijimbi mambo wafumisheko byela byabukwasho ku mwaana kabiji ne kumupisha kulutwe ya pulatifomu, kabiji wa mwambila mba 'wabukwa.' Bino aye wabepele, kabiji waubile kintu kyapusanako na mikabizho yakwa dokotala, onkao mambo watanwa na mambo akuuba kintu kyakubula kupewa sambu."

83 Kabiji Mr. Coe waimene, ne kwamba mba, “Mwane, Nakana yoyo ng’ambilo. Lesa ye wabukile nsongwalume.”

84 Kabiji chibishi wamambo waambile mba, “Naimpuzha muntu yense uji muno mu kochi kana ayo ng’ambilo yakonsha kwikala yakine, ya kuuba mba Lesa wakonsha kubuka awa nsongwalume ku lubaji lumo lwa pulatifomu, kabiji wamuleka waikala wakolwa kulubaji lukwabo. Inge ayo ng’ambilo yakonshika kwitabizhiwa na Baibolo, nanchi Naamba mba Mr. Coe uji bulongo na ng’ambilo yanji.”

85 Kabiji musapwishi wasutwile kuboko kwanji, ne kwamba mba, “Mushingi kwi anweba, mwane, mwaswisha Amiwa kwi kyamba?”

Kabiji chibishi wa mambo waambile mba, “Ambai.”

86 Kabiji musapwishi waimene, ne kwamba mba, “Bufuku bumo, pa kalunga kamwaba, kimye bwato bwabo bucheche bwajinga pepi kuloba, luketekelo lonse lwa kupuluka lwapwile. Bamwene Yesu, Mwaana wakwa Lesa, ke eye kasa enda pa meema. Kabiji umo wabatumwa, wa jizhina ja Petelo, waambile mba, ‘Inge anweba yenu Iye, Nkambo, ng’ambilai ng’ende pa meema ngiye kuji Anweba.’” Kabiji aye waambile mba, “Aye Nkambo waambijile mutumwa Petelo mba, ‘Iya.’ Kabiji aye wafumine mu bwato, mwane, ke endenekwenda byonka bya endelengatu Yesu, na kwenda pa meema. Bino byo aumwine moyo, watatwile kwibila kasa akyangye kufika kwajinga Yesu.”

Awa chibishi wamambo waambile mba, “Ao mambo apwa.”

Tubena kukeba butangi bwa Mupashi Wazhila, kechi bwa bantu bafunda ne.

87 Saulo, mwaana Kishi, wabikilwe kwikala mukulumpe pa bantu, kabiji wasendele biumbi bibiji bya banabalume, kabiji Yonafwani wasendele kiumbi kimo. Kabiji Yonafwani waile kujibumba ja mazhita ne kwibatapa bena Amoli, bena Amoli, byonkabyo. Kabiji byo—byo ebatapile, Saulo waimbile tolopita, ne kwamba mba, “Anweba mwamona bya uba Saulo.” Aye watatwile kwi lundumika.

88 Ponkapotu inge muntu umo waikala mukatampe Dokotala wa Byabulesa, nangwa watambulapotu kintu kimo ku jizhina janji, aye wikala, wakilapo nangwa ne, wibiyuka-tu-byonse.

89 Lesa bantu banji bekala bechepesha. Lesa bantu banji bekala bekepesha. Inge mwamona muntu umo ke ambe mba batambula Mupashi Wazhila, kabiji batatula kwi abanya abo bene, kimweshatu, amba kechi baji na Lwitabilo ne, kasa benda kyende ende, kasa bebika patu po babula ne, vulukaitu mba, kechi batambula Nkambo Yesu ne.

90 Nanchi twatana kuuba mba mulwanyani watwelamo. Kabiji aye waishilenga mukachi ka jibumba jicheche ja bantu ba Lesa, ne kukeba kulobola jiso ja kilujo ja muntu yense.

<sup>91</sup> Abyo mulwanyi byobyoy esekesha kuuba, ke kufumyamo meso onse abiji, inge wakonsha kwikyuba, pakuuba mba bantu kechi bakonsha kumona kyo babena kuuba ne. Abyo Satana byo eseka kuuba leelo ku Mwinakilishitu yense, ku mulobola meso anji a bumupashi, pakuuba mba bakonshe kulondelatu maana a milanguluko ya bumuntu, kabiji kechi maana a Mupashi Wazhila kasa abena kumutangijila ne.

<sup>92</sup> Nanchi byobyoy baubile, kushindwa kukatampe byo kwaishile, pano Saulo wachibile bang'ombe babiji bakatampe ne kwibatuma ku bantu bonse. Kabiji Nakeba mba mumone papo, kimye Saulo kyo atumine misunyi ya nyama ku mwina Isalela yense, ne kwamba mba, "Lekai muntu yense ukabula kulondela Samwela ne Saulo, mulekai, awe ng'ombe, ekale nobe *bibye*." Bushe mwamona bujimbijimbi bo aesekele kwimenako ayemwine ne muntu wa Lesa nyi? Byo—byo kyajinga kyabulwa mu bwinakilishitu! Moyo wa bantu wajinga mambo akwa Samwela. Pakuuba Saulo wasendele bantu bonse mba bamulondele mambo bantu bachiyinenga Samwela. "Balekai balondele Samwela ne Saulo."

<sup>93</sup> Kabiji bimye binga, leelo, byo twikyumvwa kyokyo! "Atweba twi Kipwilo kikatampe. Atweba twi Kipwilo kya Kilishitu. Atweba twi Kipwilo kya Lesa. Atweba twi—twi *kananga-ne-kananga*." Kilengela bantu kwikala na moyo, kabiji ne kulanguluka mba ipo pa bena kwingila Lesa. Kabiji kechi bakeba butangi bwa Mupashi Wazhila ne. Kibawamina abo kulondela bantu byonkabya, mambo batemwa kwikala bwikalo bwabo abo bene pa buke bwabo. Batemwa kuketekela byobasaka bene kuketekela.

<sup>94</sup> Mwikimona nyi? Aye Mupashi Wazhila ye Mutonyi wetu. Lesa kechi witupele papa ne, nangwa bishopu ne, nangwa uji yense ne, amba ekale Mutonyi. Aye Mupashi Wazhila, Bumuntu bwa Lesa, mu musango wa Mupashi Wazhila, ye Mutonyi wetu ne Wakutangijila. Pano, kika kyo kyaikela byobyoy?

<sup>95</sup> Nasashijila mulekeleko abwe bwitote, kabiji ke ng'ambilo ya bwitote bingi. Amiwa kechi ne kitazha mu kuuba mba ne tota ne. Ne kyambila kufuma pa butemwe.

<sup>96</sup> Bino Mupashi Wazhila waamba mba kyatama banabakazhi kutenda suki yabo. Kabiji ke kintu kyatama banabakazhi betu kumvwala tuputula tuheche ne twalukula, kabiji ne kupeta mivumbo yabo ne bilungi byabo na pechi. Aye Mupashi Wazhila waamba mba kyatama.

<sup>97</sup> Bino tukeba bantu kwitubula mba kijitu bulongo, "Kikulutu mubena kulondela amiwa ne Samwela." Batemwa kwikala moba sikisi, monse mo basakila, ne kuya ku kipwilo Pamulungu lukeelo. Kabiji wawaina uji na maana a kukoleji na madigili avula wakonsha kwamba kwi abo byambo bicheche byakonsha...ne bisela bicheche wabikamo, abyoy byakonsha



kubaba matwi abo ne kwibalengela kumvwa bulongo, nobe umu uba bisela nangwa mitachi ya matelevizhonyi. Kabiji ne kwibalombelela ka mulombelo kacheche, kabiji ne kwibatuma ku nzubo na kamusango ka—ka kwibalengela kwikala nang’umvino- yakushininwa amba bauba bupopweshi bwabo. Ayo kechi yo nkebelo ya Mupashi Wazhila ne.

<sup>98</sup> Aye Mupashi Wazhila ukeba obewa kwikala bwikalo bwa bulesa, pajuba pajuba mu mulungu, kabiji ne bufuku bonse, ne kwi abanyako anweba bene kufuma ku bintu bya muntanda.

<sup>99</sup> Pakuuba kipwilo kechi kikeba kyokyo ne. Abo bakeba muntu umu wakonsha—wakonsha kulumbulula Baibolo mujishinda jo bakebelamo Kwikyumvwinamo. Abo kechi bakonshwa kuteleka ku Jiwi ja Mupashi Wazhila kasa jibena kwamba kupichila mu Baibolo ne. Bavula mwi abo basaka kwamba mba, “Moba a byakukumya apita.” Akyo kyo kileta kubabana mu bantu. Basaka kwamba mba, “Kechi kujipo lubatizhilo lwa Mupashi Wazhila ne.” Bantu kechi basaka ngubilo ya pusanako na yubilamo bakwabo bonse ba muntanda ne. Kechi bakeba kuya mukwakwa na bilungi byabo byaomvwewa ne, kabiji—kabiji banabalume kasa baji na mwekelo yawama ne, kabiji kechi na mishanga mukanwa kabo ne, kabiji—kabiji ne fwesho, ne mipaipi, ne—ne bintu bikwabo bantu byo boba. Kabiji banabakazhi bakeba suki yabo yatendwa kasa iyi ipi bingi, ne—ne tundeleshi twipi tobamvwala, kabiji ne kumwesa misango yabo, ne bintu byobakeba. Abo—abo bakeba bantu bakwibabula mba, “Abyo bijitu bulongo.”

<sup>100</sup> Nanchi, bufuku bukwabo, kwaishile mwanamulume na nkumbula, amba mambo Nasapwila kukanya kyokyo, aa madinominesheni akatampe, pepi nobe faivi bwabo, baambile mba, “Atweba tukamuleka Mulongo Branham kechi tukobapo kintu nangwa kimo nanji ne. Obewa kana ukabwezhe aa matepu, ne kulomba lulekelo lwa mambo, nangwa ne tukakuleka.”

<sup>101</sup> Naambile mba, “Amiwa nkemana na Kyambo kya Lesa. Inge kyasenda bintu byonse biji mu bumi bwami, Amiwa kashala na Kyambo. Kabiji Amiwa . . .”

Waambile mba, “Kyawama, kechi wakonsha kubwezha *aya-ne-yoya* tepu nenyi?”

<sup>102</sup> Amiwa naambile mba, “Amiwa kechi nasapwilapo kiji kyonse, mu bumi bwami, kyo Naumvwinapo buvu ne. Amiwa kechi nakonsha kubwezhapo matepu nangwa byo balekonda ne. Amiwa nashala na byaamba Mupashi Wazhila. Byo Nakonsha kwikelako nangwa kufwa nabyo.” Pano kechi kweseka kwamba pe amiwa mwine ne. Bino Amiwa mbena kukeba kwimupa kyakumwenako kya bintu bibena kubiwa, pakuuba mba mumone ne kukwatakanya. Ke bantu basaka kutangijilwa na bantu.

103 Abo kechi bakebelenga Samwela ne. Nanchi kasa bakyangye kumushinga manyi Samwela kwikala mfumu. . . nangwa Saulo, mfumu, ndekelaiko mambo, Samwela waishile kwi abo jibiji. Kabiji Amiwa nsakwamba mu mulaka nobe wi kyamba leelo. Anweba mwakonsha kwikitanga. Aye waambile mba, “Kika kyashupako Lesa kwikala Mfumu wenu?”

“Kyawama, atweba kechi tumumona Lesa ne.”

104 “Kyawama, Amiwa ne ntomesha Wanji,” Samwela waambile mba, “Amiwa ne mubulapo kiji kyonse kyabubela nyi? Bushe Amiwa naaulapo kiji kyonse kyabujile kufikizhiwa monka mo Naambijile mba kikobiwa? Bushe Amiwa kechi ne mubula anweba Kyambo kya Nkambo nenyi? Kabiji Amiwa nsakwimwimpuzha kikye: Bushe Naiyapo kwi anweba na kulomba mali enu nyi? Bushe Amiwa natolapo kiji kyonse kwi anweba? Bushe Amiwa ne muletelapo kintu kingi nyi kanatu ABYO BYOBYAAMBA AYE NKAMBO? Kabiji Lesa wibishinikisha, kimye kyonse, amba kyajinga kya Bukine.” Kabiji Aye watumine mwela wakikukwila ne mvula (Anweba mwayuka Kinembelo, anweba, ponkapa.) pakuuba mba kikale kyakushinikisha mba Samwela wajinga kyatunwa kyakwa Lesa.

105 Kabiji byonka Samwela byo ajinga kipasha kyalumbuluka: Leelo, Mupashi Wazhila— Mupashi Wazhila ye kyatunwa kyakwa Lesa: ao wambatu byonka byaamba Baibolo; ao waketekelatu byonka byaamba Baibolo, kabiji kechi wakonsha kupusanako Nanji, nangwa pachechetu ne.

106 Bino abo bakebelenga muntu wakonsha kwibabulako kyapusanako. Kabiji bantu kechi baambile mba kwaula kwakwa Samwela kechi kwajinga kwalumbuluka ne. Bakumbwile ne kwamba mba, “Samwela, byonse byo waambile mu Jizhina ja Nkambo, aye Nkambo wibifikizha monka mo waambijile. Kechi mujipo nangwa kimo kyabubela ne. Obewa kechi waishile kwi atweba na kulomba mali etu ne. Obewa wikwashishenga obewa mwine. Obewa kechi witwipwizhepo amba tukubilepo kikatampe, kintu kyakilapo ne. Obewa waketekela mwi Lesa obe, kabiji Aye wakupokolola ku bintu byonse. Kabiji byambo byobe byonse byakine. Bintu byonse byo waambile mu Jizhina ja Nkambo byaubilwa monka mo waambijile. Nangwa byonkabyo tubena kukeba mfumu.”

107 Mwamona kintu kyapusanako nyi? Mwakonsha anweba— anweba kumona abwa—abwa bujimuku bwa kwa diabola, byo bwakonsha kwingila mu muntu nyi? Mukifulo kyakwipana aye mwine wamulume nangwa aye mwine wamukazhi ku Mupashi Wazhila, kabiji ne kuteleka ku ABYO BYOBYAAMBA AYE NKAMBO, pakuuba mba bumi bwatoka, muntu uji na byubilo byabulwa kuzhilululwa, bantu bapusanako, kyaalo kyazhila, bantu baji nangubilo-yapusanako; abo bajinga baila mumo na ntanda, kabiji ne kuuba nobe ntanda, kabiji ne kuya ku kyubilo

kimo na kwamba mba, “Akyo kijitu bulongo, obewa ubila monka mo ne kutwajijila.”

<sup>108</sup> Wakonsha kumona byokiji nyi? Baamba mba, “Kechi kujipo kintu kyakwamba mba lubuko ne. Oo, lubatizhilo lwa Mupashi Wazhila kyajinga kintendekesho kya kipwilo.” Mu byambo bikwabo, nanchi Lesa watolele bantu, ne kufumyamo Mupashi Wazhila mu kipwilo, kabiji ne kuleka dinominesheni ikishimike. Ine, ine. Kechi kujipo kintu kyayewo musango ne. Aye Mupashi Wazhila, Kyambo kya Bukine, wajinga wakukutangijila poso Yesu waiya. Bino ajo jo jishinda mo—mo kyaijile.

<sup>109</sup> Saulo waishile mu bufumu. Aye mukatampe. . . Aye waikajile ja jibumba jikatampe jakulondela. Oo, wajinga na makebo awama bingi. Aye wajinga na banyimbi. Aye wajinga na bisolelo, wajinga na mafumo. Oo, aye wibakijile bonse ba mu byaalo. Kabiji aye wibaletejile bumulwila ntanda buji nasambu ya bantu kukila byonse bantu byo baumvwinepo.

<sup>110</sup> Kabiji abyo madinominesheni etu ne bipwilo byo byauba leelo. Atweba tuji na kishimikwa kya kipwilo kyabaya bingi mu ntanda. Atweba tuji na bantu bamvwala-bingi bulongo mu kyaalo kyonse kyapanshi. Atweba tuji na bya masukuulu byavula byo twaleta.

<sup>111</sup> Nobe bantu bakwa Saulo bafunjishe banabalume bya kulama jifumo, kabiji bakonsheshe kwenda ne kupitang’ana poso byaalo byonse kebebachine. Bajinga bantu bafunjishiwa, kabiji byonsetu. Bino, juba jimo, kwaishile kimye kimo kwaishile wa kumokyombesha. Kabiji kyasekeshe mazhita onse abena Isalela poso byo baimene, na kuzakama mu masapo abo. Goliata ye waletele kokwa kwikyombesha, “Inge Lesa obe uji byonka mwamba mba aye byo aji! Anweba yenu wafunjishiwa bulongo.” Kabiji aye wibakyombeshe. Abo kechi bayukile byakuba ne. Abo awama, makebo anengezhiwa bulongo kechi aingijile ne. Mafumo abo kechi aingijile. Kwajinga kintu kimo kyo babujile kumvwapo, kunyuma, kyaubingwe.

<sup>112</sup> Kabiji na munema yense ne mushingi wa bulesa, kabiji mushingi ne munema, kabiji ne butemwe ne lumvwang’ano lwa bupopweshi bwa Bwinakilishitu, Naamba kikye: Natangile, juba jikwabo, mu kipepala kya byambo kya mu Africa, ako awa mwana Kishi, kyombeshi wetu waktwala mambo awama, kimye Mwinamuhamendi wa mukyombeshe, Billy Graham. Waambile mba, “Inge Lesa obe ye Lesa, lekai Abuke wakolwa nobe byonka byo Aambile mba Aye ukekyuba.” Kabiji mwana Kishi, na mazhita onse, bazhindaminetu abo bene kabiji bafuminemo mu kyaalo, kasa bashindwa. Kyajinga kya buvu. Wetu Lesa ye Lesa.

<sup>113</sup> Tuji na bipwilo byetu byawama. Tuji na mashinda mwakutwajila mambo awama. Atweba tulipila banyimbi. Tuji na makwaya akilapo, tuji na mikungu ya bishimikwa

yalepesha mu kyaalo. Tuji na bantu bakila kuwama, bamo baji bingi na mali. Atweba tuji na bafunjishiwa bingi. Atweba tuji na masukuulu a mambo awama kufika nepeene; twakonsha kusapwila; twakonsha kubulang'ana. Twakonsha kusapwila ne kuleta bantu, kabiji ne kuleta ma milyoni pamwaka pamwaka, aba baitabila, kwiya mu kipwilo. [Kafwapo bijipo pa tepu ne—Waku.] Banyimbi betu balipilwa, betu batwala mambo awama bafunjishiwa, kechi bayuka bya kukumanya bya kwikyombesha ne. Kafwako nangwa kimo kyo bayuka ne. Abo kechi bayukapo nangwa kimo kya bulume bwa lubuko Lwanji ne, bya lubatizhilo lwa Mupashi Wazhila, bya bulume bwakonsha kufumya kivule pa muntu ubena kufwa na kaasa, ne kumukasulula. Abo kechi bayukapo nangwa kimo pa kyokyo ne. Abo kechi bafunjishiwa mu jojo jishinda ne, nobe Saulo ne jibumba jaji jalengwanabantu byo bajinga.

114 Bino lekai ng'ambe ku bantu bakwa Lesa, kabiji ne kubaana benu, pakuuba muyuke mba Lesa kechi ushatu bantu kwakubula kamonyi ne.

115 Kwakubula ne kuyukanyikwa, kwi Saulo, Saulo kechi wayukilepo kintu nangwa kimo ne. Bino Lesa wajinga na Davida mucheche kunyuma kokwa mu mitumba kuntu kumo, akwa kechi kwajinga kujisha mikoko pa seku ya busapwishi ne. Aye wibatangijilenga ku musezho wa meema azhindamatu kabiji mu nsono ya munyevu. Aye wateleko muchima ku mikoko ya bashanji. Kabiji umvwe kintu kimo kya nyemenako, mulwanyi, na kutolapo umo pamikoko ya bashanji, aye wayukile bulume bwa Lesa bwa kupokolola yoya mikoko.

116 Lesa ukiji na Davida, kuntu kumo, ao wayuka byo kyalumbulula kupokolola umo wa mikoko yakwa Lesa, kupichila mu bulume bwa kwa Lesa. Aye wakiyuka pabyobyobyonse.

117 Aye waketekejile. Aye kechi wayukilepo nangwa kimo pajikebo ja kwa Saulo ne, kabiji kechi wakebelengapo nangwa kimo kya mubyobyobyonse. Aye kechi wakebelengapo nangwa kimo kya madinominesheni abo ne. Aye kechi wakebelenga aja jikebo jakala pe aye ne. Aye waambile mba, "Amiwa kechi nayukapo nangwa kimo pa kikye ne. Pakuuba ndekai ngye mu bulume bo Nayuka." Aye wajishishenga mikoko ya bashanji. Aye walaminenga bulongo nsono. Aye wibapelenga kajo kaitabilwa, kabiji baikele na bumi bwawama.

118 "Muntu kechi ukekela konka ku shinkwa bunke ne. Kana ku Kyambo kyonse kifuma mukanwa kakwa Lesa, muntu kokoakekela." Aye Kafunga wakine wibajiisha. "Yesu Kilishitu keesha, leelo, ne myaka yonse." Kabiji umvwe mulwanyi wakwatapo umo, nobe mumisongo, aye wayuka bulume bwakwa Lesa.

119 Monai pa Davida wa mucheche, waimene popa. Waambile mba, “Awa muntu wakondo, kufumatu kukusemwa kwanji. Kabiji kufuma ku bwanyike bwanji, aye kechi wayukapo kikwabo ne kana jifumo ne jikebo. Aye wafunjishiwa bingi bulongo. Aye wafunjishiwa masukuulu a mambo awama. Kabiji obewa kechi wayukapo kintu nangwa kimo pakikyene.”

120 Aye waambile mba, “Akyo kyakine, mwane. Amiwa kechi nayukapo kintu kimo palulwe lufunjisho lwa maskuulu a mambo awama. Bino kuji kintu kimo kyo Nayuka, kuuba mba, inge mulwanyai waiya, na kusendapo umo wa pa mikoko ya bataata, Amiwa naile na bulume bwakwa Lesa. Namupokolwele. Namuletele mu mutende na bumi bwawama jibiji. Amiwa na mubwezhezhe ku kifutele kya munyevu wawama kabiji ne meema azhindama. Kabiji Lesa wampele bonkwe mu maboko ami, kabiji Namwipaille byo atolele umo wa—wa mwanamukoko, kabiji Aye watangijile kwipaya awa beyala, nanchi Lesa wa Mwiulu usa kuya pamo ne amiwa na kwipaya yuwe mbulwa mukanda mwina Filisitiya.”

Tubena kukeba butangi bwa Mupashi Wazhila. Amiwa kechi nayuka moba ami ne; kafwako nangwa umo uyuka ne.

121 Lukeelo lumo Nalajile mu mwanya wami. Kabiji Najinga . . . najinga walala mutulo, kabiji Nalotele mba Joseph wakolelwe, kabiji Namutolele mba ndombe nanji. Kabiji byo Nabukile mutulo, Najinga bingi wakatazhiwa. Naambile mba, “Kyawama, kapepo Joseph usa kukolwa.”

122 Kabiji Namwene, kuya kulutwe yami, mu kicheche, kivule kyafita, nobe musombelo wachiluluka. Kabiji kyamwekele nobe kyajinga amiwa. Kabiji Amiwa ne kimwene. Kabiji panyuma yami paishilenga Muntu umo utoka, kabiji kyajinga Aye. Natajile kwajinga bakazhi bami, kumona kana walabilenga, pakuuba mba Namumweshe, inge wakonsha kumona kimwesho. Pakuuba aye walajile.

123 Naambile mba, “Oo, Amiwa mundekeleko mambo, Nkambo. Bino, abo bobwikalo bwami. Anweba mutwala ku kyonse kyonguba Amiwa. Kimye kyonse kintu kyakonsha kumweka, mba Yenu mubena kwikyuba. Kabiji Nalangulukile mba Satana ubena kweseka kufumya kukikyene.” Naambile mba, “Inge Anweba mwakonsha kutangijila.” Kabiji byo Natajile, Namwene kilungi kyalamba bingi kyo kyangye kumonapo kya mwanamulume. Aye wajinga palutwe yami, kasa abena kutala panyuma. Aye wasutwile kuboko Kwanji ne kukwata kwami, kabiji watatwile kuya *mujije* jishinda. Kimwesho byo kyafumine pe amiwa. Japichile ja Pamulungu lukeelo, Najinga, nabukile bingi lukeelo. Apa pajinga pa Kibelushi, akye kimwesho. Kuyatu . . .

124 Amiwa kimye kyonse naikalanga wasakamana, Nalangulukanga kimye kyonse pa byakufwa. Byokiji, amiwa

pa myaka fifite, kiji, kimye kyami kikyangye...kechi nalangulukilenga mba pajipo kimye kyabaya ne. Kabiji Naikalanga wasakamana byo Nakonsha kwikala mu yewa wabulukumo, mubiji walukumo. “Kana kikekala kuuba mba Amiwa kamona balunda nami bawama kabiji, ne kwamba mba, kafwa mucheche utoka ubena kuya kulutwe, ne kwamba mba, ‘Awa uya Mulongo Naville,’ nangwa, aye kechi wakonsha kwamba mba, ‘Halo, Mulongo Branham?’ Kabiji kimye Yesu byo akeya, nanchi Amiwa kekala muntu jibiji.” Amiwa kimye kyonse ndanguluka kyokyo.

<sup>125</sup> Amiwa nalotelenga mba Najinga ku Muzhika. Kabiji Amiwa naishilenga kupita mu mpuzha muji bipupu, kabiji bakazhi bami bajinga pamo ne amiwa, kabiji twafumine na kuloba masabi. Kabiji Naimene ne—ne kushikula geti. Kabiji meulu ajinga awama bingi. Kechi a mwekelenga nobe byonka byo amweka muno mu kipachiko ne. Ajinga a bbulu, kabiji ne makumbi atoka awama bingi. Kabiji Naambijile bakazhi, Naambile mba, “Twafwainwa kwikala kuno, kimye kyapita kunyuma, mutemwe.” Aye waambile mba, “Namambotu a baana, twafwaijilwe kuba kyokyo, Billy.” Naambile mba, “Akyo. . .” Kabiji Nabukile patulo.

<sup>126</sup> Amiwa nalangulukile mba, “Amiwa mbena kulota bingi! Nakumya kana kika.” Kabiji Natajile panshi, kabiji walajile ku lubaji lwami.

<sup>127</sup> Kabiji Amiwa nasutwile pilo wami, nobe byonka by muuba anweba bantu bavula, nabikile mutwe wami pa—pa kipabi kya mutwe wamwanya, kabiji na bikile ne maboko kunyuma yami. Kabiji Nalajile byobya nobe *bibye*. Kabiji Naambile mba, “Kyawama, Amiwa nakumya kana kisakwikala kika, kulubaji lukwabo. Amiwa nafika kala myaka fifite, kabiji akafwako nangwa kimo kyo Nauba ne. Inge Nakonsha kubapo kintu kimo kukwasha Nkambo, mambo Nayuka namba Amiwa kechi kekala wakufwa ne. Afu wa kimye kyami wapita kala, kapepo, nangwa kukila pa afu. Inge Naikala kwikala ke mukote nobe bantu bami, nangwatu byonkabyo afu wakimye kyami wapita.” Kabiji Nakeketele konse konse. Kabiji Nalajile byobya, kasa mbena kukeba kubuka. Kyajinga pepi nobe sebeni koloko. Naambile mba, “Naketekela Amiwa nsakuya ku kipwilo, lukeelo luno. Inge Amiwa jiwi jayoyomena, Nakonsha kutemwa kumvwa Mulongo Neville kusapwila.”

<sup>128</sup> Nanchi Naambile mba, “Obewa wabuka, mutemwe?” Kabiji wajinga mutulo twine.

<sup>129</sup> Kabiji Amiwa kechi mbena kukeba anweba mubule kumvwa kikye ne. Kyangalulula amiwa. Amiwa kechi nji musango umo Mulongo Branham ye Najingamo ne.

130 Kabiji Natajile. Kabiji Naumvwine Kintu kimo, kyatwajijiletu na kwamba mba, “Obewa po ubena kutatulatu. Inshite ku kondo. Twajijilatu na kuya kulutwe.”

131 Nasukainye mutwe wami pa mineti umo. Nalangulukile mba, “Kyawama, Amiwa kape mbena kulangulukatu bibye.” Anweba mwayukatu, muntu wakonsha kwikala na byakufwanyikizha. Kabiji Naambile mba, “Amiwa kape naji kufwanyikizhatu kikye.”

Kyaambile mba, “Inshite ku kondo. Twajijilatu na kuya. Twajijilatu na kuya.”

132 Naambile mba, “Kapepo Amiwa yami naambatu.” Kabiji Nabikile mivumbo yami ku meno, kabiji nabika kuboko kwami pa kanwa kami.

133 Kabiji kyabwelele kyaiya jibiji, ne kwamba mba, “Twajijilatu na kuya kulutwe. Inge wakonsha kuyuka biji kupelo ya jishinda!”

134 Kabiji kyamwekele nobe Mbena kumvwa Graham Snelling, nangwa muntu mukwabo, awa waimbile awa lwimbo bibye (Bamwimba muno, Anna Mae kabiji ne anweba bonse.):

Amiwa nakolwa kumuzhi kwami, kabiji  
 Nakeba kumona Yesu,  
 Nakonsha kutemwa kuteleka mabbelu a  
 kukitulu byo avuma.  
 Akonsha kutokesha jishinda jami ne kupwisha  
 moyo yense.  
 Nkambo, ndekai mone kubushiya bwa  
 kipembe kya kimye.

Anweba mwaumvwapo ku mwimba muno mu kipwilo.

135 Kabiji Naumvwine Kinntu kimo kyaamba mba, “Wakonsha kutemwa kumona kubushiya bwa kipembe?”

Naambile mba, “Kyakonsha kukwasha papaya bingi.”

136 Kabiji Namwene. Mu kakimyetu kacheche, Amiwa... kupematu jimo Amiwa nafikile mu Kifulo kicheche kyajinga kya kukuluka. Natajile kunyuma, kabiji Nafikile kokwa, kasa nalala pa mwanya. Kabiji Naambile mba, “Akye ke kintu kyenyi.”

137 Pano, Amiwa kechi nakeba anweba kubwezhapo kikye ne. Akye ke kya ku kipwilo kyami, nangwa mikoko yami yo Mbena kufunga. Kana kyajinga, Najinga mu uno mubiji nangwa nafuminemo, kana kwajinga kwalulwa, kechi kyajinga nobe bikwabo bimwesho byo Naikala nabyo ne. Amiwa nakonsheshe kumona Kokwa, kabiji Nakonsheshe kumona kukwe.

138 Kabiji byo Nafikile ku kyokya Kifulo kicheche, Amiwa kechi na kimona bantu bavula kasa babena kwiya na kunyema, na kubijika, “Oo, mulongo wetu wawama!”

139 Kabiji Natajile. Kabiji banabakzhi banyike, kapepo bajinga na myaka iji ku matweti, eitiini kufika ku tweti, babikilenga maboko abo pa amiwa, ne kubijika mba, “Mulongo wetu wawama!”

140 Kuno ke kwiye banabalume bakitwala, baji na mwekelo wawama ya bwanabulume bwa kyanyike. Kabiji meso abo a bekukilenga ne kumweka nobe tubaangabanga mu bufuku bwafita. Meno abo atokatu too. Kabiji babijikilenga mba, ne kukwata amiwa, kabiji ne kubijika, “Oo, mulongo wetu wawama!”

141 Kabiji Naimene, kabiji Nakeketele. Kabiji Najinga mwanyike. Natajile kunyuma pa bubiji wami wakala walala byobya, na maboko ami aji kunyuma ya mutwe wami. Kabiji Naambile mba, “Amiwa kechi nakwatakanya kikye ne.”

142 Kabiji abo banyike banabakazhi babikilenga maboko abo kuzhokolosha. Bino, Nayuka mba ajino ke jibumba jimvwanga, kabiji Naamba kikye na buwame kabiji na kukoka kwa nang’umvwino yawama ya Mupashi. Banabalume kechi bakonsha kukumbata banabakazhi kwakubula mubiji kwenda ne; bino kechi byajingako Kokwa ne. Akwa kechi kwajinga keesha japita nangwa keesha jikeya ne. Abo kechi bomvwa kukoka ne. Abo bajinga . . . Amiwa kechi na kimonapo banabakazhi balambabyobya mu bumi bwami bonse ne. Bajinga na suki yalepa kupela mu musana, masiketi alepa kupelela ku maulu abo. Kabiji bakobaminetu. Kechi kyajinga kukobama nobe nyenga yami ne, waikala popa ne, byo akonsha kukobama ne. Abo kechi bafyopelenga ne, kabiji ne Amiwa kechi ne bafyopelenga ne. Kyajinga kintu kimo akyo Amiwa—Amiwa kechi nji na—na mulaka ne, Amiwa kechi nji na byambo mwakwikyambila ne. “Bulumbuluke” kechi bwakonsha kwesakana pamo ne. “Buwame” kechi bwakonsha kwesakana pamo, nangwa pacheche ne. Kyajinga kintu kimo akyo Amiwa kyange . . . Obewa kana watanwakotu Kokwa.

143 Kabiji Amiwa natajile *kululwe* lubaji, kabiji *alwa* lubaji. Kabiji baishilenga, mu masauzande. Kabiji Naambile mba, “Amiwa kechi nayuka mwaila kikye ne.” Naambile mba, “Kyawama, abo . . .”

144 Kabiji Hope ke eye. Awa ye wajinga mukazhi wami mutanshi. wanyemene, kabiji kechi waambilepo mba, “Balume bami.” Aye waambile mba, “Mulongo wami wawama,” kabiji byo akumbachile, kwajinga mwanamukazhi mukwabo waimene byobya, naye wakumbachile, kabiji pano Hope wakumbachile yuwe mwanamukzhi; kabiji abo bene na bene. Kabiji Nalangulukile mba, “Oo, akye ke kintu kimo kyapusanako. Kechi kyakonsha kwikala . . . Kujipo kintu kimo . . .” Nalangulukile mba, “Oo, bushe Nakonsha kukeba kubwela mu yewa mubiji wanyama wakala jibiji?”



<sup>145</sup> Nakeketele konse konse. Nalangulukile mba, “Akye kyo kika?” Kabiji Natajile, kyawama bingi. Kabiji Na—Naambile mba, “Amiwa—Amiwa kechi naumvwisha kikye ne.” Pakuuba Hope wamwekele kwikala nobe, oo, mwenyi wamunema. Aye kechi wajinga wapusanako ne, bino wajingatu nobe mwenyi wamunema.

<sup>146</sup> Kabiji Naumwvine Jiwi pano jaambile kwi amiwa, amwa mwajinga mu kibamba, jaambile mba, “Akye kyo wasapwilanga mba ye Mupashi Wazhila. Abwe ke Butemwe bwapwijijika. Kabiji kafwako kyakonsha kutwela Kuno kwakubula Kikye ne.”

<sup>147</sup> Amiwa naikala watundaikwa kyabaya, kukila byo najinga mu bumi bwami, kuuba mba kisendatu Butemwe bwapwijijika, pakuuba mba utwele Kokwa. Akwa kechi kwajinga mukawo ne. Akwa kechi kwajinga kukoka ne. Akwa kechi kwajinga lufu ne. Misongo kechi yakonsha, Momwa ne. Bya lufu; kechi—kechi byakonsha kukulengela kukota ne. Kabiji aye. . . Abo kechi bakonsheshe kujila ne. Kyajingatu lusekelo lumo.

<sup>148</sup> “Oo, mulongo wami wawama!” Kabiji batwajile peulu, ne kungikajika peulu pa kifulo kikatampe kyapeulu.

<sup>149</sup> Nalangulukile mba, “Amiwa kechi mbena kulota ne. Amiwa mbena kutala panyuma pa—pa mubiji wami walala panshi byobya pa mwanya.”

<sup>150</sup> Kabiji bangikajikile popa peulu. Kabiji Naambile mba, “Oo, Amiwa kechi nakonsha kwikala pano peulu ne.”

<sup>151</sup> Kabiji banabalume ne banabakazhi baishilenga, kufuma ku mbaji yonse ibiji, kasa baji mu bwanyike bwabo, na kubijika. Kabiji mwanamukazhi umo waimene byobya, kabiji wabijikile, “Oo, mulongo wami wawama! Oo, tuji bingi na lusekelo pa kukumona Kuno.”

Amiwa naambie mba, “Amiwa kechi naumvwa kikye ne.”

<sup>152</sup> Kabiji pano aja Jiwi jaambilenga, kufumina peulu yami, jaambile mba, “Mwayuka, kyanembwa mu Baibolo mba bangauzhi babungizhiwe pamo na bantu babo.”

Kabiji Naambile mba, “Ee. Navuluka kyokyo mu Binembelo.”

Waambile mba, “Kyawama, akye byo kikekala umvwe wabungzhiwa pamo na bantu bobo.”

Naambile mba, “Nanchi bakekala bakine, kabiji Nakonsha kwi bakwata.”

“Oo, ee.”

<sup>153</sup> Naambile mba, “Bino, kuji mamilyoni. Kechi kuji ba Branham bavula byobya ne.”

<sup>154</sup> Kabiji aja Jiwi jaambile mba, “Kechi ba Branham ne. Abo ke bowaitabizhe. Abo boboba bo waletete kwi Nkambo.” Kabiji waambile mba, “Bamo mu baabo banabakazhi, bo ubena

kulanguluka mba balamba bingi, bajinga bakila pa myaka naite mu kimye kyo wibatangijile kwi Nkambo. Oene mambo kyo babena kubijikila, ‘Mulongo wetu wawama!’”

<sup>155</sup> Kabiji babijikile, pa kimyetu kimo, amba, “Inge kechi waile ne, atweba kana kechi tuji Kuno ne.”

Nakeketele konse konse. Nalangulukile mba, “Kyawama, Amiwa kechi mbena kwi kyumvwa ne.”

Naambile mba, “Oo, Yesu uji kwepi? Amiwa nakeba kumumona Aye, kyabaya bingi.”

<sup>156</sup> Baambile mba, “Pakino kimye, Aye ujiko palepako, konka *kwa* kulubaji.” Baambile mba, “Juba jimo Ukeya kwi obewa.” Mwamona? Baambile mba, “Obewa watuminwe, kwikala tangi. Kabiji Lesa ukeya. Kabiji umvwe Aye waiya, Ukakuchibila mambo monka mwaila byo wibafunjishanga, kitanshi, kana bakonsha kutwela nangwa ine. Atweba tukatwela monka mwaila kufunjisha kobe.”

<sup>157</sup> Naambile mba, “Oo, Amiwa nji bingi nalusekelo. Bushe Paulo, naye wafwainwa kwimana byonkabye nyi? Bushe Petelo wafwainwa kwimana byonkabye nyi?”

“Ee.”

<sup>158</sup> Naambile mba, “Nanchi Amiwa nasapwijile Kyambo kyonse kyo basapwijile. Amiwa kechi nafumineko kwi Akyo ne, kuya ku lubaji lumo ne kukwabo ne. Pobabatizhe mu Jizhina ja Yesu Kilishitu, ne Amiwa ne kyubile. Po bafunjishe lubatizhilo lwa Mupashi Wazhila, ne Amiwa ne kyubile. Kyonse kyo bafunjishe, ne Amiwa ne kyubile.”

<sup>159</sup> Kabiji ne boba bantu babijikile, ne kwamba mba, “Twayuka kyokyo. Kabiji twayuka mba tukuya pamo ne obewa, juba jimo, kubwela pantanda.” Baambile mba, “Yesu ukeya, kabiji ukachibilwa mambo monka mwaila Kyambo kyo wasapwijilenga kwi atweba. Kabiji umvwe uketabilwa pakyokya kimye, akyo byokikekala,” kabiji baambile mba, “pano obewa uketupana atweba kwi Aye, nobe michinya ya mwingilo obe.” Baambile mba, “Obewa uketutangijila kwi Aye, kabiji, bonse pamo, tukabwela pantanda, na kwikala myaka ne myaka.”

Naambile mba, “Bushe Nakonsha kubwela pa kino kimye?”

“Ee. Bino twajijilatu na kuya kulutwe.”

<sup>160</sup> Nakeketele. Kabiji Nakonsheshe kumona bantu, byonka byo Nakonsha kumona, kasa beya, na kukeba kukumbata, kasa babijika, “Mulongo wetu wawama!”

<sup>161</sup> Ponkapotu Jiwi jaambile mba, “Byonse byo watemenwe, kabiji ne byonse byakutemenwe, Lesa wakupabyo Kuno.” Kabiji Nakeketele. Kabiji kabwa wami wakala ke eye, waishilenga na kwenda. Awe ke eye mbili wami, kabiji wabikile mutwe wanji pa kipuzhi kyami, ne kunusha. Jaambile mba, “Byonse byo

watemenwe, kabiji ne byonse byakutemenwe, Lesa wibipana mu kuboko kobe, kupichila mu mwingilo obe.”

Kabiji Naumwine amiwa mwine kufumako kuyooya Mpuzha yawama.

<sup>162</sup> Kabiji Nakeketele kuzhokoloka. Naambile mba, “Obewa wabuuka, mutemwe?” Aye wajingatu walala.

<sup>163</sup> Kabiji Nalangulukile namba, “Anweba Lesa! Oo, amiwa kwashai, Anweba Lesa. Kechi mundeke ndubakanyepo Kyambo kyenu kimo ne. Lekai amiwa ngikale bulongo na kyokya Kyambo, ne kwi Kisapwila. Amiwa kechi natakochimama na mambo abintu byakosha kwiya nangwa kuya ne, byuba muntu uji yense ne. baanga ba Saulo baku. . .baana bakwa Kishi bemane, binga *bibye*, *byobya*, nangwa abya *bikwabo*. Lekai amiwa, Nkambo, twajijile kuya kuyoya Mpuzha.” Moyo yense walufu. . .

<sup>164</sup> Naamba kikyee, na Baibolo uji kulutwe yami, lukeelo luno. Amiwa njina nsongwalume mucheche kokwa, myaka foolo, bakukomesha. Amiwa njina nsongwakazhi wa-myakana; kabiji wa myaka-icheche, abo bo Nasachila, baalulukila kwi Nkabo. Lesa, ndekai ngikale na bumi, pakuuba mba ne bakomeshe mu mafunjisho akwa Lesa.

<sup>165</sup> Kabiji pa byonse byo, ntanda yonse ibena kumweka nobe ibena kubijika kwi amiwa, banabakazhi ne banabalume ba koma-myaka-naite, kabiji ne bamisango yonse, “Inge kechi waile ne, atweba umvwe kechi tuji Kuno ne.”

<sup>166</sup> Kabiji, Lesa, lekai twajijile kulwa kondo. Pakuuba inge kyafika pa kimye kya kufwa, Amiwa kechi nji na moyo ne. Kyakonsha kwikalala ke lusekelo, kyakonsha kwikalala ke buwame, kutwela, kufuma mu bubwe bubole ne byabuvu.

<sup>167</sup> Inge Amiwa nakonsha kulenga, kuya peulu, wanu aduleendi bbilyoni mailoshi peulu, kishimkwa kya sikweya, kabiji abwa bo Butemwe bwalumbuluka, tapulo yonse kuya mumwe, iya na kukepa, poso twafika pano potuji pa kino kimye. Kyakonsha kwikalatu ke kivule kya bubole, aka kakintu kamo ko twakonsha kumvwa kabiji ne kwikakwata mba kujipo kintu kimo. Atweba kechi twayuka kana ng’anyi Kintu ne.

<sup>168</sup> Oo, balunda nami bawama, batemwe bami, batemwe bami ba Mamboawama, baana bami basemwa kwi Lesa, telekai kwi amiwa, kafunga wenu. Anweba, Nakeba mba inge kwajingapo jishinda jimo jo Nakonsha kwikilumbulwilamo kwi anweba. Kechi kujipo byambo; byo Nakonsha kutana; kechi bitanwapo kuji konse. Pakuuba kulutwe ya kupema kwapelako, kuji kintu kyawamisha anweba. . .Kechi kujipo jishinda ja kwi kilondolwelamo ne. Kechi kujipo jishinda ne. Amiwa kuuba ne kyuba ne. Bino kiji kyonse kyo wakonsha kuba, mulunda, shai bintu byonse bikwabo poso watambula Butemwe

bwalumbuluka. Wafika pa kifulo kya kutemwa muntu yense, mulwanyi yense, ne bintu bikwabo.

<sup>169</sup> Alwa lupepu lumo Kokwa, kwi amiwa, lwandengela amiwa kwikala ke muntu wapusanako. Amiwa kechi, kechi, kechi nakonsha kwikala musango umo Mulongo Branham Ye najingamo ne. Nangwatu mandeke abena kuluma, nangwatu mvula ubena kubyasha, nangwatu sipai uji na buta pe amiwa, musango yense mo kyaikela, kechi kisakamika ne. Amiwa nsakutwajijila na kulwa kondo, konka kulusa lwakwa Lesa. Mambo, Nasapwila Mamboawama ku kilengwa kyonse kabiji ne muntu yense ye Nakonsha, na kwibakajikizha kuya kuyoya Ntanda yawama kokwa.

<sup>170</sup> Kyakonsha kumweka kwikala kyakosa. Kyakonsha kusenda bulume bwavula. Amiwa kechi nayuka kana kwakishala bimye binga ne. Atweba kechi twayuka ne, kwamba mwaila bumuntu. Aya...Kupichila mukipimwa kwami aja juba jikwabo, waambile mba, "Obewa uji na myaka tweti-faivi yakosa, bumi bwawama. Obewa wakosa." Akya kyakwashishe. Bino, oo, akya kechi byokiji ne. Akya kechi byo kiji ne. Ke kintu kimo kyaikela *mumwe*. Abwe bubole bwafwainwa kumvwala bubula kubola. Awe ufwa wafwainwa kumvwala ubula kufwa.

<sup>171</sup> Baana bakwa Kishi bakonsha kwimana. Amiwa...Byonse bintu byawama byo boba, Amiwa kechi jipo na kintu kimo kyatama kyo nakonsha kwamba ne, kupana kubalanda kabiji ne byabutemwe. Kabiji vulukai, kika, Samwela kyo aambijile Saulo mba, "Ne obewa ukaula." Kabiji bavula ba mubobo bantu ke bakatampe, basapwishi babulume, bakonsha kusapwila Kyambo nobe bamalaika bakatampe. Bino nangwa byonkabyo kechi kyajinga kyaswa muchima wakwa Lesa ne. Lesa ye wafwajilwe kwikala tangi wabo. Mulongo, nyenga leka Mupashi Wazhila akutangijile.

Twayai tukunyike mitwe yetu pa kakimye kacheche.

Amiwa nakolwa ku muzhi, kabiji Nakeba  
kumona Yesu,

Nakonsha kutemwa kuteleka mabbelu a  
kukitulu byo avuma;

Akonsha kutokeshwa jishinda jami ne kupwisha  
moyo yense;

Nkambo, lekai tumone kubushiya bwa  
kipembe kya kimye.

Nkambo, ndekai mone kubushiya bwa  
kipembe kya bulanda ne moyo,

Lekai mone aja juba jatoka;

Jakonsha kukosesha lwitabilo lwetu ne  
kupwisha moyo yense;

Nkambo, balekai bamone kubushiya bwa  
kipembe kya kimye.

172 Amiwa nashininwa, Nkambo, inge kikye kipwilo kicheche, lukeelo luno, kyakonsha kumona bushiya bwa kipembe: kechi byakumanama mukachi kabo ne, kechi mwakonsha kwikala byobyoye ne; kechi misongo ne; kafwako kikwabo ne kanatu kulumbuluka. Kabiji Pajitu mpemeno imo pakachi ka kuno ne Kokwa, kufuma ku bukote kuya ku buyufi, kufuma mu kimye kufika ku Peenape, kufuma kukoka kwa mibiji kwa keesha, kabiji ne bulanda bwa jakesha ja pita, poso kufika ku kimye kijipo kya Peenape mu kulumbuluka.

173 Nalomba, Lesa, amba Anweba musakupesha muntu yense uji muno, inge muji booba muno, Nkambo, abo babula kwi muyuka Anweba mu yewa musango wa Butemwe. Kabiji kyakine, Taata, kafwako nangwa kimo kyakonsha kutwela muyoya Mpuzha yazhila ne kwakubula yewa musango wa Butemwe, kusemwa Kupya, ko kusemwa jibiji. Aye Mupashi Wazhila, Lesa, ke Butemwe, kabiji twayuka kuuba mba akyo kine. Nangwa twakonsha kwendesha mitumba na lwitabilo lwetu kechi kintu ne, inge twauba bintu bikatampe, ne apo, kwakubula Kyokyo ne, atweba kechi twakonsha kukajila aya ndandalashi ikatampe ne. Bino na Kyokya, Kitusutula kukila pa bibye bya kusakasaka bya inontanda. Nalomba, Taata, amba Anweba musakupesha bantu muno.

174 Kabiji lekai, mba, muntu yense wang'umvwa amiwa, lukeelo luno, abulang'ane abwe Bukine, amba Anweba musakwikala bakamonyi bami, Nkambo, nobe Samwela mukote mba, "Bushe Amiwa ne bambilapo kintu kiji kyonse mu Jizhina Jenu kanatu kyajinga kyakine?" Abo bo bamutonyi. Kabiji Amiwa na babula ponkapano, Nkambo, amba Anweba mwatwajile ku yoya Ntanda. Kabiji Anweba mwayuka mba akye kyakine.

175 Kabiji pano, Taata, inge mujipo bamo abo babula kwimuyuka Anweba, lekai kikye kikale kimye kyo bankosha kwamba mba, "Nkambo, bikai mwi amiwa nkebelo ya kwikala ke kyaswa muchima Wenu." Kiswishai, Taata.

176 Kabiji pano, anweba, na mitwe yenu ya kunama, mwakonsha kusutula maboko enu, ne kwamba mba, "Ndombeleleko, Mulongo Branham, kyaswa muchima wa Lesa mwi amiwa."

177 Pano kimye kyo mukiji ponka pomuji, na buwame bonse, kika kyakubula kwambila ba Taata, "Lesu, monka mu muchima wami, leelo, Nakana bintu byonse bya ntanda. Nakana bintu byonse, pakuuba mba Anweba ne mutemwe kabiji ne kwimwingijila Anweba, bumi bwami bonse. Kabiji Amiwa kakonsha, kufuma ku jino juba, ne kuya kulutwe, kwi mulondela Anweba, mu Kinembelo kyonse kya mu Baibolo Wenu"? Inge kechi mwabatizhiwa mu lubatizhilo lwa Bwinakilishitu ne, "Amiwa naswa, Nkambo."

178 "Inge Amiwa kechi natambula Mupashi Wazhila..." Anweba mukayuka umvwe Mwamutambula. Aye ukemupa—Aye

ukemupa luketekelo ne Butemwe bo mukeba. Oo, anweba kape mwauba kyapusanako, mwajinga na ng'umvwinu ya ku mubiji, nobe anweba kape mwabijikile nangwa kwamba najimi, akyo kijitu bulongo. Bino umvwe abwa Butemwe bwa Bulesa kechi mobuji ne, ketekelai ponkapano, ne kwamba mba, "Nkambo, bikai mu muchima wami, kabiji ne mu mweo wami, kufika kwa Mupashi Wenu, amba Nakonsha kutemwa, ne kupana mushingi, kabiji ne kwikala na bobwa Butemwe bwa Bulesa mu muchima wami, leelo, abo bwakonsha kutwala ku yoya Ntanda inge muya wapelako wafuma mwi amiwa," kasa tubena kulomba. Lombai, anweba bene, ponkapano. Mujishinda jenu anweba bene, lombai, ipuzhai Lesa kwimubila kyokyo anweba.

<sup>179</sup> Nemutemwa anweba. Nemutemwa anweba. Anweba bantu bawama bamitwe-yavwi mwaikala muno, mwaingila nangovu ne kujisha baana babacheche! Anweba balanda, bamaama bakote mwafumishenga mipolo kufuma mu meso abo! Lekai shinikishe kiky kwi anweba, nyenga, mutemwe, kechi kiji byobyobyo kubushiya bukwabo bwa pemeno ne. Naketekela mba Kijitu kya bukine mu kibamba. Ke lubajitu lwa kibese kkwabo kyo twikalamo. Abwe ke buboletu bo twikalamo pa kino kimye.

<sup>180</sup> "Bino bikaimo mwi amiwa, Nkambo, kyaswa muchima Wenu kikale." Lombai, kimye kyo tubena kulombela pamo.

<sup>181</sup> Namunema yense, Nkambo, namambo a Kyambo Kyenu ne Mupashi Wenu Wazhila, twasekela bingi pakuyuka kufuma Kusemwa kwetu. Twasekela mambo atweba "kechi twasemekelwe mu kyaswa muchima wa muntu ne, nangwa kyaswa butushi ne, kana ku kyaswa muchima Lesa."

<sup>182</sup> Kabiji twalomba, leelo, Taata, amba abo babena kwipuzha lusa lwa kwibalekela mambo, amba Mupashi Wenu usa kwingila yeo mwingilo, Nkambo. Kechi kujipo jishinda amiwa ja kwikyubilamo ne; Amiwa ne muntutu, mukwabo mwaana Kishi. Pakuuba twimukeba Anweba, Mupashi Wazhila.

<sup>183</sup> Lesa, lekai amiwa ngikale Samwela, umo ubulang'ana Bukine bwa Kyambo. Kabiji Anweba mwi Kishinikisha, kufika pano, kabiji naketekela mba Anweba musakutwajijila, kikulu Naikala wakishika kwi Anweba.

<sup>184</sup> Lekai bonse pano batambule Bumi bwa Peenape, Taata. Lekai jino juba kechi jikafume mwi abo ne. Mu kimye kyo kikeya kya kufuma pa ino ntanda, lekai kiky, kyo Naamba kwi abo, kikafikizhe bututulu. Kabiji byo twaikala muno, banutu bafwa, leelo, kasa tutala pa koloko yetu, na kulanguluka kajo ketu kamulajilo, ne pamingilo yetu keesha, pa bya kusakamana ne mingilo ya bunu bumi, kechi bikekalako ne. Byonse bikapichijila. Akwa kechi kukekalapo byakusakamana ne; kabiji kukekala lusekelo lumo lukatampe lwa Peenape. Bapai awa musango wa Bumi, Taata, uji yense. Kabiji lekai. . .

185 Naipuzha Anweba kikye, Taata, amba muntu yense uji muno lukeelo luno, ao wang'umvwa amiwa kwamba kikye kimwesho, lekai Amiwa kakumanye yense mwi abo kubushiya bukwapo; nangwa mwakonsha kwikala banabalume muno bakonsha nkupachika, kabiji ne banabakazhi, ne abo pamo. Bino, Taata, kechi muleke akyo kimane mujishinda jetu ne. Lekai tukebakumanye Kokwa, kabiji bakanyeme, ne abo, ne kwikwata umo ne mukwabo, kasa tubijika, "Mulongo wetu wawama." Lekai kikekale nobe byonka byo kyamwekele Kokwa, Nkambo, ku muntu uji yense, bonse bo Natemwa, kabiji ne bonse batemwa. Nalomba mba kikekale byonkabya, Nkambo. Kabiji ne batemwa bonse. Lekai bakamweke, Taata. Nebapa Bumi bwa Peenape pano. Lekai bobo kibese kyabo, kya Kwikiswa. Mambo Nekipuzha mwi Yesu mu Jizhina. Amena.

186 Tuji na bimye bicheche, bya kulombelela bakolwa. Namona tuji na mucheche, nsongwakazhi wakolwa muno, kabiji ne inetu mukipona.

187 Pano, ku balongo bami bawama, banyenga, nasashijilapo kechi mung'umvwine mujishinda jingi ne. Amiwa—Amiwa kechi nayuka kyamwekele ne. Amiwa kechi nayuka kyamwekele ne. Bino, Lesa, inge Nafwa, lekai kabwele Kokwa. Mukandeke kaye kuyoya Mpuzha, iko ko Nasaka kwikala, konkakwa kana kwaji kwepi. Amiwa kechi mbena kweseka kwikala nobe Paulo ao watwajilwe mu jiulu ja busatu ne. Amiwa kechi mbena kwamba kyokyo ne. Naketekela mba Aye waesekelenga kutundaika, ne kweseka nkupa kintu kimo kya kutwala kulutwe, mu mwingilo wami wakatatika ubena kwiya.

188 Bushe kyakonsha kumweka kyabula kinto inge Natangapo kintu kimo papo, pa kimyetu kicheche? Kyakonsha kwikalatu bulongo? Umo magazine waya lulumbi mu kyaalo, Billy Graham:

189 "*Dokotala Billy Graham Waichilwe Ku Islam*, pa kipepala kitanshi kya *The Afrikaans Times*, Kubomukata pa fifitiini, 1960. Munembeshi wasawakwa, ao wajinga mu Moslem, mwina Mohammedan, walanguluka mba bya kukumya byafwainwa kulondela kusapwila kwa Mambo awama akwa Kilishitu, ujitu pamo keshu, leelo, ne myaka yonse. Twaambula: 'Kiji bino: Kilishitu walaile Banji bakumulondela, Aye byo aambile mba, "Aye waitabila mwi Amiwa, mingilo yo Nguba ne aye ukeyuba; ne yakuba paiye ukeyuba.'" Bushe Kipwilo kiyingila ino mingilo, ko kuuba mba, abya—abya bipangwa bya Kilishitu mu Baibolo? Kyakonsheka Kubiwa leelo? Bushe kipwilo kiji kyonse kyakonsha kupusanyako, kwingilapo nangwa afu ya bya kukumya bya ubile Kilishitu, kechi kwamba mba "mingilo ikatampe ne"? Wakonsha obewa, nobe muntu bunke bobo, wayukanyikwa, ng'ambi wa Benakilishitu, imana, usangule bafu babwele ku bumi? Wakonsha kwenda pa kalunga nyi? Wakonsha kubuka bakolwa ne kupana meso ku bampofu? Kechi

ikyo ne, mwaila kilubo kyangongolwa peulu, kyangongolwa na ba Mohammedan? Nangwa kutuma nangwa kwesekwa kwi Kilishitu...?... balondela nobe ng'ambilo ya bamo, nangwa mu luketekelo lobe? Kyaitabilwa kusawakwa wa ma Moslem ke ng'ambilo imo yabula kulondakana na ikwabo."

<sup>190</sup> Abo balengulula yuwe mu Moslem, bino wajingatu bulongo. Pakuuba bino byo byo baambile:

<sup>191</sup> "Mukumbu wawama ke wa kutanga Baibolo, kabiji ne kuyuka Koran. Awe Koran ushindwa kuuba mba... kupichila... ushindwa kupichila mu kwibyesakanya pamo. Ng'ambilo ya balondela Mohammed yakila bingi kuwama kabiji yakila ya Benakilishitu, ya lumbuluka," (n-g-'a-m-b-i-l-o) "ng'ambilo," (Naketekela mba), "byakufwanyikizha. Munembeshi, nangwa byonkabyo, wakwata pa kintu kyanema bingi kyatala pa byakukumya byalamata ku Kipwilo. Bino papo twazhinauka bukishika bwa munembeshi, mambo ng'anyi wakonsha kutongola nangwa kupachika byakukumya byaubile Rev. William Branham ku meso a ma Moslem mu South Africa, kimye biumbi jikumi po batambwile Kilishitu mba Mupulushi mu ng'ingijilo ya kwa William Branham, ku Durban, South Africa, kabiji ne kukwabo mwaya kyaalo kyapanshi, nangwa kwi T. L. Osborn mu East Africa? Nangwa byonkabyo twaimana aduleendi paseti kulubaji lwakwa Billy Graham. Twaambile pakikye kikomo kyaipuzhiwa, ke kyakubula... Akye kikomo kyaipuzhiwa kechi kyanema ne."

<sup>192</sup> Bino mukachi ka byonse bye (Bangichile amiwa... baambile mba twibajimbijimbi, amba kechi twayuka kyo tubena kuuba ne.), bajinga bakamonyi, mu pepala wabo bene, mba Lesa ye wikyubile, nangwa byonkabyo. Lesa ukijitu Lesa, leelo, nobe byonka byo Ajinga. Anweba mwakonsha kulanguluka mba kechi bekitabila ne, abo kechi bekimona ne. Kijitu kyabula kufyamika; kechi kyubiwa mu koono ne. Kabiji ma aduleendi a biumbi bya bantu kasa baikala ponka, ne kumona be kimona. Byo bamwene awa kilema, nsongwalume wamanama waishile popa, Mpashi Wazhila wamubuula pa bumi bwanji, ne bikwabotu, kabiji kika kyamwekele popa. Kabiji twamwene biumbi jikumi bya ma Moslem kulala abo bene panshi, sulubya, ne kuswa Yesu Kilishitu kwikala Mupulushi wabo.

<sup>193</sup> Tukiji naji T. L. Osborns, kabiji ne bakwabotu, aba bakijisha Kajo-kamikoko. Naketekela mba Mulongo Osborn ukyangye kutanwapo mukachi ka ba ma Moslem ne. Bamba mba abo bakifya bingi. Bino tukiji na Lesa wakonsha kupokolola mikoko kufuma ku bonkwe, wakonsha kupokolola mukoko kufuma ku mbeyala.

<sup>194</sup> Kyangwamijile bingi pa kuyuka mba bekinembele kabiji ne kwikituluka. Ine, balanguluka mba abo kechi booba ne;



bafumako ne kuvundaminako manyuma abo, ne kamba mba, “Aa, aa moba apita.”

<sup>195</sup> Awa Moslem waambile mba, “Byo baji nyi? Awa Baibolo yense wapita. Anweba bonse mwaya mungi. Anweba mubena kupompwela Muntu, Muntu wafwile, kabiji Jizhina Janji jajinga Yesu. Kabiji Aye wafwile, myaka yapita yavula, kabiji kechi kujipo mba Aye ukasanguka ne.”

<sup>196</sup> Bino kechi baambile kyokyo pa kupwila kwa ku Durban ne. Akwa Aye waimene na kuuba bintu bimo byonka byo Aubilepo, kibashinjile. Pano bino ne—ne madinominesheni babwela, yekawa muntu wanembele ne nkumbuula mba Nafwainwa kupesapesa—mo lufunjisho lwami mu Baibolo, iye wanembele byo byo mupepala wabo. Lesa ukebalengela kumutakaika Aye, nangwa byonkabyo, nanchi, nangwa kikale byepi. Abyo ibyo. Aye ukebalengela kumutakaika Aye, nangwa byonkabyo.

<sup>197</sup> Tuji na mucheche, nsongwakazhi waikala papo. Awo mwana obe nyi? Lukatazho lwanji luka, nyenga? [Nyenga waamba mba, “Ke kufuma mashi kubongo.”—Waku.] Maama? [“Kufuma mashi kubongo.”] Kufuma mashi kubongo. [“Na nembele kwi obewa, myaka yavula yapita, pa mashi a kubongo bwanji.”] Oo, ee. [“Ubena kukolwa pano, kikekala ke myaka foolo mu Kasalakanduba.”] Myaka foolo, mu Kasalakanduba. [“Mulongo Neville waya konka na kumumona.”] Oo, wafuma ku Marengo, nangwa kuntu kumo konkakwa? [“Paoli.”] Paoli. Bushe awe ye nsongwakazhi, nanchi? Kujitu kintu kimo, maama, wakonsha kupulusha nsongwakazhi: ko kuuba mba, Lesa wamuyuka. [“Waikala bulongo kukila byo ajinga.”] Amiwa njibingi na lusekelo pa kyokyo.

<sup>198</sup> Bushe mwafikako na kumulombela, Mulongo Neville? [Mulongo Neville waamba mba, “Ee, mwane.”—Waku.] Byo kyaikala Mulongo Neville wajikuyako na kumulombelela, waikalako bulongo. Kobakiji ba kafunga bayuka Kajokamikoko.

<sup>199</sup> Lukatazho lobe luka, mutemwe nyenga, waikala mu kipona kokwa, obewa? [Nyenga waamba mba, “Uji na kaasa.”—Waku.] Kaasa.

<sup>200</sup> Kyawama, inge Nakonsha kwimwipuzhako kintu kimo, ponkapano. Baanga muno babukwa na . . . na kaasa? Sutulaiko maboko enu. Tala kuno, nyenga. [“Aye kine washika matwi, kabiji kechi wakonsha kumvwa byo waamba ne.”—Waku.]

<sup>201</sup> Lesa ye Ubuka. Twayuka kyokyo. Inge Nakubuula mba Nakonsha kuyako kokwa na kupwisha kufuma kwa mashi kubongo pa nsongwakazhi ne kumulengela kwikala bulongo, Nakonsha kwimubula kintu kingi, nangwa, kufumya kaasa pa mwanamukazhi. Bino Nayuka kintu kimo, kwajinga mbeyala (kaasa, kitumbwatumbwa, bumpofu, kabiji ne lufu) watolele mikoko imo yakwa Lesa, juba jimo, kabiji Naileko na bulume

bwa Lesa, kabiji Namwipaile ne kubwezha yewa mukoko. Abyo ibyo. Kabiji tubena kuya kulutwe leelo, kechi na kintu kikatampe ne, *kananga-ne-kananga*. Amiwa mbeni kuya na malekenyi acheche a milombelo. Aye usa kumubwezha.

202 Obewa waketekela kyokyo, kechi ibyo nyi, nyenga? Waketekela, ne obewa, kechi ibyo nyi, nyenga? Baanga ba mwianweba baketekela na muchima wabo pano?

203 Pano anweba kunyikai mitwe yenu mu kimye Amiwa kyo mbeni kulomba.

204 Mutemwe Taata, nsongwakazhi walamba walala papo, ao wakonsha kubula kwenda, nangwa kwendauka, kanatu Anweba mwamukwasha. Mulwanyi wamukwata. Wafika pakipimo kya kukakalwa badokotala. Mulwanyi wamutwala palepa bingi mu lwelele, poso dokotala kechi wakonsha kuubapo kintu kimo ne. Bino kechi uji kwalepa Anweba ko mwakonsha kubula kufika ne, Nkambo. Aye ujitu ponka Anweba po mwakonsha kubika kuboko Kwenu pe aye. Monka mwaila Kyambo kya Lesa, Nabika maboko pe yuwe mwanamukazhi mwanyike, kabiji ne kuzhachisha mashi kubongo. Mu Jizhina ja Yesu Kilishitu, na mwita ku mubwezha ku mwanamukazhi mututulu jibiji. Ukekela ku lukumo lwa Lesa. Lekai ekale bulongo, kwenda kutwela mukachi ne kulupuka kufuma muno mu kipwilo, nobe bakwabo batwela muno, baji na bipashako ku kikye, panai lutakaiko kwi Lesa. Kikale byonkabyo, kupichila Yesu Kilishitu.

205 Nobe suki yanji yo bawamisha, kimye kichechetu, kabiji nishi wafika mu yoya Ntanda kokwa ako ko Namwene kafwako nangwa umo mukote ne, kanatu banyike. Bino batemwe banji baikala muno, kujila, kabiji bamutemwa. Mulwanyi mukatampe wamukwata ne kumutwala pakonsha kubula kufika badokotala, bonkwe ulenga moyo wa kaasa. Lesa, Naiya, na kumulondela. Naiya na kumubwezha. Naonauna bonkwe wa kaasa, mu Jizhina ja ubula kushindwa Kilishitu, kwi Aye Amiwa nkonaikala tomesha. Lekai kimuleke, kabiji lekai ekale bulongo, ne kwikala myaka yavula, nangwa byonkabyo, kwikela kumunema ne lukumo lwa kwa Lesa, kupichila mwi Yesu Kilishitu Nkambo yetu.

206 Pano, Taat Wamwiulu, akye kechi ke kilwilotu kikatampe ne, kechi jifumo jo bawamishatu ne, mulaka ne ng'ambilo ya umo ng'ambi ne, bino na kintu kya kimye kyonse, malekenyi acheche alwitabilo. Naiya kunanga yuwe mweo, kabiji ne mubiji wanji ao mulwanyi wa kaasa wamutwala badokotala po bakakalwa kufika. Pakuuba Nanangatu aye, lukeelo luno, Nkambo, ku mubwezha ku nsono ya munyevu ne meema azhindama. Mu Jizhina ja Yesu walushijilo, kwi Aye nkonaikala tomesha Wanji. Na lwitabilo lubula kukoka, Naketekela mba

usakuletwa, kupichila mu bulume bwa yuwe mulombelo ye twalomba. Nanchi kikale...?...

207 (Naketekela mba kuji mwingilo walubatazhilo. Koaji nyi?) [Mulongo Neville waamba mba, “Ee, mwane. Basapwishi babiji baji na balunda bakyangye kubatiziwa ne.”—Waku.]

208 Mwakonsha kusutulako mutwe wenu pakimye kichechetu? Bakafunga bambula...

209 Abo bantu baji bingi, baji bingi na misongo. Basakwikalatu bulongo. Kechi mube... Kijitu bulongo. Lesa milaye yanji kechi ikakalwa ne. Twi ilondelatu.

210 Baji na lubatizhilo lwa mu meema. Kuji bantu bamo bafwainwa kuya. Tusakwikala na kupwila kukwabo bufuku buno.

211 Mujipo umo muno usa kubula kwiya bufuku buno, wakeba mba tumulombelele ponkapano, ao usakubula kutanwako bufuku? Mwakonsha kwiya pa kyonka kino kimye, anweba musakubula kwiya bufuku buno. Amiwa nsakwikala na kimye kyabaya; ne kulenga mulaini wa milombelo, bufuku buno. Bafwainwa kubatizha babo bantu.

212 Muji na nsongwalume mucheche koko? Kijitu bulongo. [Mulongo umo waamba mba, “Kijitu bulongo inge Nakonsha kukupa kikye?”—Waku.] Ee, mulongo. Nakusachila, bingi. Kijitu bulongo inge Nakonsha kutanga palutwe kacheche nangwa ponkapano? Nemusachila, mwane.

213 Pano inge mwakonsha kwitupa mineti umo nangwa babiji, atweba nanchi tusakwikala na—na mwingilo wa—wa lubatizhilo. Nayuka mba mubena kumusaka.

214 Kabiji aba babena kukeba lubatizhilo lukeelo luno, kyawama, anweba, bainetu yainga *kukwe* na kukingya byakumwala, kabiji banabalume baye ku *lulwe* lubaji. Kabiji kimye kyo mbena kulombelela babo bantu, nanchi musakwinengezhanga kuya ku lubatizhilo. Kabiji aba pano...

215 Pano, bufuku buno, Nsakweseka kwikala na—na mulaini mucheche wamilombelo, bufuku buno, ponkapotu, bukijitu inge baiya. Kabiji tusakutapila mu Buuku wa 1 wa Efisesa, bufuku buno. Kabiji tusakwikala bingi nalusekelo pakwikala nenu, inge kechi muji na kipwilo kyakuyako ne. Pakuuba inge muji na kafunga wenu ne kipwilo, nanchi anweba—anweba mwatanwa ku kipwilo kyenu kyawama kyomutundaika.

216 Inge anweba musakuya, kabiji musakufumamo pa kino kimye, Lesa emupeshe. Mwatanwa ne atweba jikwabo inge mwakonsha. Tukekala balusekelo kwikala nenu.

217 Obewa usakulombelwa, ne obewa, mulongo? Lukatazho lobe luka? Kwenda mashi lubilo.

218 Pano, anweba mwashala, byo mubena kukunyika mutwe wenu, pa mineti umo, twakeba kulomba.

219 Taata, Amiwa ne musachila, leelo, pa malekenyi acheche akwa kafunga, mulombelo waji kuleta bonkwe ku manungo anji, kabiji ne mwanamukoko waji kupokololwa kufuma kwi aye, ne kumubwezha kwi inanzi ne shanji. Nalombelela mulongo wetu. Nalomba mba Anweba musakumuletatu mu mutende, ne aye, Nkambo. Lekai kwenda kwa mashi lubilo ne makatazho a mu mubiji wanji apwe. Amiwa namulondelela, Nkambo, na kumubwezha, mu Jizhina ja Yesu Kilishitu. Kikale byonkabyo. Amena.

Lesu akupeshe, mulongo.

Pakuya panshi, Nakumona kasa walama muheche, mpofu mwanjike.

220 Kintu kimo kyo Nakonsha kwamba. Najinga na . . . wakolwa bingi, walashilenga. Kabiji Nalangulukile . . . Amiwa kechi nakeba mba anweba kimupite kikyene, inge makonsha. Nalangulukile mba, “Lesu, Nakonsha kupanaka inge Amiwa nakonsha kumvwa muntu waimana pangye? Mukazhi wami waamba mba, ‘Billy, kuji bashetu bakulumpe baiya na kukumona.’

221 “Kabiji kwaiya muheche, mulunda wa mutwe-wakipala uji na myevu yamvwi mu kilungi kyanji. Aye wakonsha kutwela ne kwamba, mba, ‘Obewa wi Mulongo Branham?’

“Amiwa naamba mba, ‘Ee, mwane, Yami iye.’

222 “‘Jizhina jami Simon.’ Wabika kuboko kwanji pe amiwa, kabiji wantala pa mineti umo. Ne kwamba mba, ‘Obewa wi waitabila, Mulongo Branham.’

“‘Ee.’

223 “‘Kisakwikalatu bulongo.’ Shimona Petelo, wa mu Baibolo. Byo Nakonsha kusata pa kyokyo! Aye kechi waambile byavula ne. Wambikatu kuboko kwanji, mba ikalatu bulongo.”

224 Kabiji pano kyaishile kwi amiwa, kupichila mu bukwashe bwa Lesu, ne mu lusa lwa Lesu, kuji makumi a biumbi bya bantu baitabila kintu kimo, inge Nakonsha kwiya kwi abo. Kabiji Nalangulukile mba, “Nkambo, lekai fike ku uji yense ye Nakonsha, nanchi. Ndekaitu ngube—ngube . . .”

225 Nalangulukile mba, “Inge Shimona, nangwa Paulo, bamo ba mwiabo, baishile ne kwamba mba, ‘Obewa Mulongo Branham?’

“‘Ee.’

226 “Wabika kuboko kwanji pe amiwa, ne kutala pe amiwa, kabiji ne kwamba mba, ‘Kijitu bulongo, Mulongo Branham,’ fumamotu.

227 “Amiwa sakukosa. Amiwa sakwikalatu bulongo. Kine. Naambile mba . . . Nsongwalume, lutundaiko lwami lwaile

palutwe kufumatu ponkapa. Amiwa naambile mba, ‘Amiwa sakwikalatu bulongo.’” Ee, mwane.

<sup>228</sup> Kabiji kuji bantu baitabila kintu kimo leelo. Kabiji akyo kyo Nsakwishila kuno na kuuba, na kubika maboko pe anweba ne kwipuzha Lesa.

<sup>229</sup> Amiwa nakeba kuya na yuwe nsongwalume mucheche, nyenga, pa mineti umo. Aye ke mucheche, nsongwalume mpofu. Waikala bimye binga na bumpofu? [Nyenga waamba mba, “Kufumatu kukusemwa kwanji.”—Waku.] Kufumatu kukusemwa kwanji.

<sup>230</sup> Byepi, nsongwalume mucheche! Oo, uji bingi bulongo, nsongwalume mucheche...?...

<sup>231</sup> Anweba Lesa walusa! Pabula kufika badokotala, pa kusemwa kwa yuwe nsongwalume mucheche, wasemekelwe bumpofu, kabiji kechi wakonsha kumona ne; awe walamba, watemwikwa mucheche nsongwalume. Kabiji mulwanyi, mulunda mucheche kasa akyangye kwikala na kimye mu bumi, bamutwajile kubula kufika ma dokotala. Nanchi, Amiwa naiya na kumulondela, lukeelo luno, Nkambo. Ao apelatu, malekenyi acheche a milombelo. Lekai na mubwezhe, Lesa. Nakumanya mulwanyi, diabola, mu Jizhina ja Yesu Kilishitu, kabiji Nakebela Lesa yuwe nsongwalume. Nakeba meso anji, kukebela Lesa, na bwezha abya Satana byo amwibijile. Lekai ekale nao. Mu Jizhina ja Yesu Kilishitu, kisa kubiwa. Pano, kikale byonkabyo.

<sup>232</sup> Pano, nyenga, mutemwe, pano, kechi mwikale na luzhinauko nangwa lumo ne amba awe nsongwalume mucheche usa kwikalatu bulongo. Kabiji Nakeba anweba, mukamulete kuno ku kipwilo, na kumweshwa bantu, wakonsha kumona, pano, wakonsha nyi?

Mupai meso anji, mu Jizhina ja Yesu Kilishitu...?...

<sup>233</sup> Nkambo Yesu, kubika...Awe mucheche ye twalombelela bingi! Bino, lukeelo luno, Naiya jibiji mu Jizhina ja Yesu Kilishitu, kasa nasenda ao malekenyi acheche Anweba o mwampele. Kaiji Anweba mwakwasha na bubwe, Nkambo, konka ku Bulume Bwenu, kutambula...kufuma mukanwa kakaasa, kufuma mu kanwa kalufu alo lwine, kusangula bafu panyuma ya kwambilwa mba bafwa, ne mubiji wakosakana kabiji wauba ne munyango. Naiya kulondela yuwe mulwanyi, mu Jizhina ja Yesu Kilishitu. Nanchi namuleta mu bumi bwawama jibiji, Nkambo. Kiswishai. Kikale kyaubiwa, ku lukumo lwa kwa Lesa.

<sup>234</sup> Kabiji obewa usakulombelelwa? [Nyenga waamba ne Mulongo Branham—Waku.] Obewa waitabila? [“Ee.”] Nkambo, Namuleta, pakonsha kufika ao malekenyi acheche. Mu Jizhina ja Yesu Kilishitu, lekai kimufume ne kubwela jibiji ne.

235 [Nyenga waamba na Mulongo Branham—Waku.] Kyawama, aa onka acheche malekenyi, aile na kukwata Mulongo Harley, kabiji ne mwana obe wamukazhi ne obewa mwine.

236 Pano, Taata Wamwiulu, Nananga mulwany, kwingijisha ao malekenyi acheche Anweba omwampele, mambo Anweba mwaambile mba, “Inge obewa wakonsha kulengela bantu bakwitabila, kabiji waikala wabukishika pa kulomba,” aja jibwe jicheche jakonsha kufika pa kwipayang’ana. Lekai pano kiye, Nkambo, byo Mbena kwikituma monka mwaila kulomba kwanji. Mu Jizhina ja Yesu Kilishitu, lekai kikale byonkabyo. Amena.

237 [Nyenga waamba kwi Mulongo Branham—Waku.] Kijitu bulongo, nyenga. Pano atweba. . . Mishipeshipe yafika pantu pabula kufika madokotala. Bakonsha kukupa kintu kimo kiji nobe kyakuzhindamikapotu, bino kyakonsha kukulengela kukila pa kipimo, panyuma ya kyokya. Ee. Pano talai. Atweba tubena kwikilondaizha, lukeelo luno. Kuyako; na kukubwezha. [Kafwapo biji pa tepu ne.]

238 Nkambo Yesu, . . . [Kafwapo kijipo pa tepu ne—Waku.] . . . mabwe acheche atanu, l-w-i-t-a-b-i-l-o, kabiji ne malekenyi a milombelo. Kabiji Amiwa mbena kuleta nyenga yami kufuma mu minyololo ya lubazhibazhi. . . ? . . . kokwa. Amiwa mbena kumubwezha ku mutemde ne ku nsono ya munyevu ne meema azhindama. Nauba kikye mu Jizhina ja Yesu Kilishitu. Amena.

[Nyenga waamba ne Mulongo Branham—Waku.]

239 Taata Lesa, awe nsongwakazhi mucheche, twaikala bingi na lusekelo mambo kechi lukatazho lwa mu misunyi ne. Bino nangwa kikaletu byepi, kikijitu pa kifulo kyo mwakonsha kufikapo Anweba, Nkambo. Kabiji Amiwa naiya malekenyi acheche a lwitabilo, kabiji ne jije jibwe. Kabiji Amiwa nashijika jije jibwe na bulume bonse bo Nakonsha kwijitaya. Mu Jizhina ja Yesu Kilishitu, lekai jifikile ponka pa kifulo. Lekai nyenga yetu ekale bulongo. Nauba kikye mu Jizhina ja Yesu Kilishitu.

[Nyenga waamba na Mulongo Branham—Waku.]

240 Nobe yuwe maama mwanyike, ne mwananji mucheche, mucheche ye abena kukeba kusambakana nanji kubushiya, kulubaji lukwabo, mu yoya Ntanda ya lukumo yo najikwambapo, kabiji abo. . . Bainanji kechi bakekala na bumi. . . bwa kukomesha yuwe mulongo mucheche ne, kabiji nangwa yuwe mulongo mucheche kechi wakonsha kwikala kwakubula bukwasho Bwenu ne. Bino Amiwa mbena kwiya na malekenyi, na bulume bonse kabiji ne kushika ko Nakonsha kwikala nako pa mulwany. Kabiji mu Jizhina ja Yesu Kilishitu, Naasa jije pe aye. Basakwikalatu bulongo, konka kulukumo lwa Lesa. Mu Jizhina ja Yesu. Amena.

[Nyenga waamba na Mulongo Branham—Waku.]

241 Oo, akye kyawama bingi. Amiwa nasekela. Kyawama, awa mwingilo, nanchi, wajinga mwingilo wakatongwela bantu. Watongwelenga ku mingilo . . . ? . . .

242 Taata Wetu Wamwiulu, Satana watwala yuwe maama mucheche pakonsha kubula kufika madokotala. Bakonshatu kutaya muchi mujoja jishinda, Nkambo, akyo kyakonsha ku mutabaula konse, konse, kyakonsha ne kumulengela kubula kuyuka koaji. Kabiji umvwe wayuka, wakala wakilamo. Pakuuba Amiwa mbena kwiya na malekenyi a lwitabilo, na jibwe, kutazha ponka na kishika, kuyatu ponka pa kyaso. Mu Jizhina ja Yesu Kilishitu, Nafumyapo alwe lubazhibazhi kufuma pe aye, konka kulukumo lwa Lesa. Amena.

[Muntu umo waamba na Mulongo Branham—Waku.]

243 Mutemwe Lesa, Mulongo George walala, ubena kufwa, kechi kala ne, Amiwa namwene lwitabilo byo lwamubijile. Pano uji na kikola kyakukola misunyi, Nkambo. Twavuluka mba bakonsha kumupa muchi, bintu bimo bya kukepesha kutata, bino kechi kyakonsha kufumyapo akyo kintu ne. Nanchi twamutazha iye milombelo, mu Jizhina ja Yesu Kilishitu. Lekai akye kikola kiyenga. Lekai ayenga ku nzubo kasa aji bulongo.

Nakusachila, mulongo.


244 Uji byepi, mutemwe? [Nyenga waamba na Mulongo Branham—Waku.] Oo, ami! Matwi abena kushika. Wakonsha kumvwa nangwa pacheche nyi? Uu-uu. Kechi pafwainwa kufika bumuntu ne! Obewa wi waitabila mwi Nkambo Yesu? ["Amena."] Namona mwanamukazhi walamba Kokwa, juba jimo ja ao moba. Obewa ukekala mwanyike jibiji myaka ne myaka. Nayuka mba obewa ukeba kwikala pa kino kimye konka ku lukumo Lwanji. Kubwela ku . . .

245 [Nyenga waamba mba, "Ine, Amiwa mbena kujila mwanami."—Waku.] Mwanobe. ["Awo waile papita kukila pa myaka ibiji."] Bushe kechi wakonsha kumutana ne? ["Aye uji mu maboko akwa Lesa."] Oo, aye—aye waile? ["Uu-uu. Kupita mu kipachiko kya lufu."] Oo, akyo. ["Kabiji bya kwijizhanya kwami."] Uji-nabulanda. Ee. ["Njina bulanda . . . Amiwa njina-bulanda. Kabiji Naumvwa nobe, inge kyo kyaswa muchima wa Lesa, Nakonsha kutemwa Aye wasenda. Amiwa kafwako kyo njinakyo ne kanatu lusekelo mwi Aye."]

246 Nyenga mutemwe, Nakeba obewa kuya ko wakonsha kumvwa bulongo. Bushe wajikumvwa kimwesho, lukeelo luno? [Nyenga mukwabo waamba mba, "Wakonsha kumvwatu bulongo."—Waku.] Kyawama, umubule.

247 Kyawama, aye usa kukubula kyamwekele. Kukilatu po tubena kupemena pano, awa nsongwalume wawama ubena kukupembelela. Obewa ukekalatu mwanyike nobe aye. Butemwe, obewa temwatu . . . [Nyenga waamba mba, "Amiwa

kechi mbena kukeba kwikala ne. Nakeba kuya kwi Aye, inge kyo kyaswa muchima wakwa Lesa.”—Waku.]

<sup>248</sup> Mutemwe Taata Wamwiulu, lubilo lwa bumi lwaubiwa kala. Kechi kujipo byavula byashalako ne. Kabiji nsongwalume wanji wawama, kubushiya bwa mukola, inge wakonsha kutala pa nyuma, wakonsha kwamba mba, “Ke mobatu acheche.” Aye ubena kupembelela bwato, Nkambo, abo bukamusenda kumupisha mu kafwa, kuya kuyoya Ntanda yawama. Mupeshai, Taata, kabiji tekeneshai muchima wanji. Kabiji lekai akwa kukekale kusambakana kukatampe, kubushiya bwa mukola. 



*MFUMU YE BAKANA* KDE60-0515M  
(The Rejected King)

Ino Mbila na Mulongo William Marrion Branham, yalupwilwe patanshi mu Kizungu Pamulungu lukeelo, Ndoolo 15, 1960, ku Branham Tabernacle ku Jeffersonville, Indiana, U.S.A., byafumishiwa pa tepu ukwata ne kufyatula kabiji bya nembwa mu Kizungu kwa kubulwa kupimpulwa. Ino ntuntulwilo muki Kaonde ya nembelwe ne kusampanya na ba Voice Of God Recordings.

KAONDE

©2022 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)